

式洪室遺稿

張學華題



PL  
2781  
.A51

大

大

武

武

堂

堂

藏

藏



# 目錄

序

治秋詞序

後漢逸民贊序

賀鄧筱赤中丞重宴鹿鳴序

黃幼農觀察六十壽序

外姑何太夫大九十壽序

陳循仲姑丈壽序

鄧筱赤宮保九十壽徵詩文啓

招雨田九十壽序

黃鑄山世丈八十雙壽序

前題

盧乃童

募修鼎湖山慶雲寺啟

廣東地方自治研究錄序

楊母傅太夫人

光祿寺卿黎召府君行畧

代

書

闔省業戶爲沙捐事上廣東督撫名憲公呈

代

倡辦鐵路啟

爲沙田加抽致朱省長公函

致張堅白制府書

致唐少川委員論沙捐書

復梁節龢書

與康長素書

上潘嶧琴先生書

復宋松存書

答沈廣虞太守書

與侯東洲書



與盧肅卿書

與趙嘯湖書

致陳桓士書

度紫荊關與西安諸同人書

復張豫荃提學書

致喬懋蓀左丞李柳谿右丞書

上學部呈送美洲華僑學冊文稿

## 少作

廣州新建節孝祠碑

南海沙頭堡議建萬安院募疏

友論

海防論

中西學緩急輕重論

夏日泛舟大通寺徧歷花地園林序



姜松村封翁七十有一壽序

約崔璞存書

致崔璞存書

與龍石蓀書丙子

與劉君書

復康長素箋

上龍舜臣舅舅書

先曾祖左桓光祿公家傳

原任順天府尹候補四品京堂梁公家傳

誥授光祿大夫頭品頂戴護理兩江總督江甯布政使梁府君行狀

星垣公家傳

少泉公家傳

潘任卿觀察公家傳

古今體詩共一百六十首

詩



# 式洪室詩文



番禺梁慶桂小山著

## 冶秋詞序

杯泛紅螺織就錦樓之記訊傳青鳥剪餘香海之鐙時也花田雨歇漁笛風來解綵纜而開晴轉牙檣而泊晚紺山碧水樓閣參差繡轂雕鞍鸞鈴絡繹踏江天之明鏡鴛侶俱仙卷水閣之珠簾鶯聲十里崔護唱迷香之引門立桃鬟張緒醉倚翠之魂堤舒柳眼人來今夕與明月以俱圓歡憶春餘怕銀雲而流去此南海康長素君冶秋詞所由作也於是尋巢舊燕淨埽麝痕舞鏡雙鸞潛通眉語篆沈薰於寶鼎響畫屨於迴闌拓朱鳥之窗素娥窺客譜文鴛之曲綠綺調琴百福簾開迎撲花之酒氣九華帳掩聽墮警之釵聲指約彊銀賦定情於五夜眉長凝翠問畫黛以何年然而蘭杜經春易傷遲暮鷓鴣啼雨慣觸羈縲艷情如絲蠶驚秋早綺夢成寸鷗怯波涼問溝水於東西好題紅葉識桃江之姊妹共載芳根月照影以成雙魚媚波而目比盤龍鏡底緣訂三生神鵲橋邊時剛七夕香籠豆蔻繡被同溫露粉薔薇晨妝共浣數三商之玉漏參昂星圓挽百褶之仙裙綺羅香膩琶洲風信佇傳妍唱於旗亭珠海潮音願播新聲於樂府

## 後漢逸民贊序

夫高尚其事義光爰象獨寐寤歌聲煥澗槃故堯封全箕穎之貞武聖有首陽之餓楚狂繼其軌魯連暢其風嶽嶽四皓罔迹商山赫赫二仲藏聲蔣逕自茲以降風流彌繁然皆介焉超俗默然



葆真棲神巖竇之間卷跡塵囂之表茹蔬飲水甘逾於八珍敝裘麻縷榮擬於五乘噉噉乎若深泉之湛屹屹乎若層峰之峻書曰君子在野斯之謂乎然而大道泯沒人情委枉洗耳之水飲犢者慮其汚買山之隱冥鴻者虞其浼言樂啟期之志經循宣聖之規青霞孤鶩明月獨朗而矯其弊者則又以鼓盆示曠夷踞鳴高於陵避兄彥國稱父標紺紫以矜色騰靡曼而雜雅是謂德賊實昧時中若斯之流竊有未取茲數公者希古並駕遺物植悵寢巢以韜其采漱石以激其清雖或干旌遠子纁帛交賁朝仁希前席之眷蒸庶望幡然之歎而浮海之志同符聖揆匪石之誠獨屈帝命志與秋天競爽理則春泉齊浦皜皜焉浩浩焉不可及已迹彼逸軌仰其峻裁感至德之長民扇高風於未沫乃援短翰作爲雜贊庶幾綵厥梗概如見蜀巖之湛冥置諸座右聊當茂先之勵志云爾

### 賀鄧筱赤中丞重宴鹿鳴序

聖天子御宇之三十四年萬物芄蘭庶彙敷豫含譽見賓連生卿雲晝輝燾於階阼甘露宵灑於林澤內外宣力之臣踴躋職植比肩輩出若吾粵筱赤宮保去鄉舉之年適過花甲奉優旨賞太子少保銜同時如仁和王相國壽陽孫相國長白銘留守并以重宴鹿鳴各邀曠典此三公者僉與公同登咸豐初元辛亥恩榜名臣耆碩萃於一科五老遊河招邀於華渚千叟侍宴舞蹈於彤墀此固國家壽考作人磅礴醞積蔚爲上瑞而公之德被黔首功膺宇內其所以致此



者誠匪偶然也公擢科綺歲耀姿郎潛甫晉烏臺首奏免廣東全省米釐使服嶺萌黎永無饑色  
識者已知公之福澤爲靡涯已滇省處畿輔之西南而大理又處滇西之窩壤其地窪寥而磽瘠  
其人情窳而儇度 天子知淮平惟俟霸能勝魏郡非岑熙不治特 命出守是邦鋒車倏臨摘  
姦普惠剔稅務之弊而減苛抽撥府倉之贏以閔善舉既膺上考首郡量移兵燹之餘供億繁重  
公黜冠虎之吏恤離鴻之氓夫役所需改歸官發大府代奏懸爲定章勸墾荒區廣栽棉樹善明  
之守海陵課種榆櫨沈瑀之宦建惠令植桑柿旋擢迤南道值裸黑土司惟蝮惟豺蹂躪邊境公  
殲渠散脅改土歸流增設鎮邊直隸廳并上改心下改心兩巡檢南人不反比戶以安柏府洊升  
棘闥監試定科塲之供給免閭閻之驛騷復懸監獄功過章程清理十數年之積牘遂使斷弊之  
書不疲於聽覽鉗鈇之刑靡積於牢犴蓋公宦滇最久善政最多巍巍蒼山勒此穹碑蕩蕩昆池  
涵此愷澤葉榆梓棟之域至今猶歌頌功德而無或忘若夫移節蘇藩則崇明之故城蘇河常熟  
昭文之水利以次修築誇其壯麗長康丹樓之語藉其宣洩薛務玉梁之規民功曰庸鏤諸篆素  
乙未之歲日人鴟張時公方署漕督知犬羊鱗介之族不可無震懼加也又知熊羆虎貔之衆不  
可以酣嬉飾也廼築堅臺廼簡軍實敵人由是不敢規長江至任皖撫則平渦易之賊蒞黔撫則  
救南丹之失在皖勦設求是學堂武備學堂在黔勦設通省大學堂武功成矣文教敷矣夫輸橐  
垂則納結有經大信也免羅織獄空囹圄渥惠也敗羣必鋤籌邊自裕壯猷也頽墜畢舉洪纖悉



藩條比及瓜期又同棠蔭雖吳中之輟輪耆舊欲借寇恂而海上之竹馬兒童爭迎郭伋此公之  
宦歷也其爲政也有龔犢羊魚之化其居官也有裴更陶甓之勤其愛民也七挖之利必興其察  
吏也六條之法以立松太者財賦之區冠蓋所湊華夷互市綏撫綦難歲在壬午有民教互鬩一  
案人心惶惶夷情要挾刻日蠕動匝地蠶屯公爭其是非判厥良莠懲不軌之士律有明條奠毀  
巢之居民無惑志遂令春申舊壤海日常清鍾阜故城夕烽無恙此則長沙懷體之言一矢不折  
魏絳和戎之策五利並興者矣若夫智炳燃犀弊去害馬恤文帳之獄慈嬭崔駟嚴計糾之條同  
符陸贄皆秩秩之良矩洵瓊瓊之鉅才此公之政績也且夫黃河萬里實導源於崑崙岑嶸千尋  
總趨宗於泰岱當先大夫開府東南之日正我公傳經子舍之時公欽承家學斐蔚門風羅羅花  
樹授韋氏之規嶽嶽高門懷柳垞之誠鶴在陰而笙簧協鳳於陽而羽毛成固知東晉名宗三貂  
著望西京鼎胃七葉重光旣度紫薇之星行建巖疆之節卽將家譜發爲政祥此公之門閥也所  
尤難者壽母令妻旣頌乎燕喜我子佩共樂乎雍熙五十而慕視猶折髮之年六十平頭尙保  
同臧之慶作不疑之一笑羨<sup>旌</sup>福之皆仙而且許武得成弟名嗣立聿行母志敦茲穆行垂厥義  
方玘瓏珪琪並作璠璣之器縝維綜絳俱爲經緯之才比北魏之十龍符周家之八士旣蘇瓌之  
有子復范喬之抱孫四世雍雍盛矣美矣至若問謝家之嬌女皆咏葛覃坦王氏之東牀並陪几  
杖飲少長<sup>圖</sup>之酒繪家門雍穆之圖皆所以悅晚志娛眉梨肸秘儀掄嘉徽者矣此公之倫紀



也其承於國恩者既渥其衍於家術者尤祥荀子云美意延年斯之謂歟慶桂等沐浴明教染濡道勛適逢皇覽之初忝豫賓筵之末竊含和而飲福謹道懿以宣徽屏鄺泉度索之華辭轉皋牢乎德政取儒林循吏之意旨兼掎拓其家傳進柏酒千觴效麥邱三祝爲公上壽民之頌卽爲太夫人稱善養之觥浩浩長江普壯猷於无量綿綿愛日願亘古以常新

### 外姑何太夫人九十壽序

歲辛酉外姑何太夫人年九十矣內弟子榮等率其孫曾奉觴上壽桂於張氏諸倩年最長敢以平昔聞見所習敬晉一言張爲吾邑望族外王舅鑑湖通判公以富饒稱家居於河南環珠橋之西臺榭綺玉名聲振一時外舅樸之司馬公承籍先業英爽豪邁喜與文人學士遊于先君尤親善也晨夕過從登堂拜母妻孥相見不引避先君起復將入都因相約爲婚姻時桂年纔八齡司馬公執桂手曰是吾婿矣比桂備館甥之列授几撰杖時侍二老人側見其家庭之間子女長幼凡數十人旣振振蕃矣男兒女壺提携滿堂無敢跬步踰桀梟者里之人咸頌其家教之成也抑吾聞之吾室人所言太夫人之淑行懿德有足爲士大夫矜式者司馬公性至孝以母於長兄尤鍾愛故析產時以膏腴讓伯氏之孤子而自取其瘠下它器物奴婢稱是世俗婦女或不無怨懟之色而太夫人視之怡然先世開設隆記茶行假貸於外者數十萬司馬公懷蘊利之誠召諸

負債者舉券悉火之太夫人曰以財物貽子孫不如以陰德貽之之大且遠也洽吾志矣順德蠶桑其利至溥司馬公有大志欲振興實業爲邑人謀久遠利遂築務本園於珠江之南又於沙灣菱塘兩司購置鄉外餘地畦畫區分合之可千餘畝養蠶植桑畧仿陳塲營元善遺法晞浴以時燥濕是候勤獎惰尉朝巡而夕課之如是者數年廼天時地利之不齊虧折鉅萬家業以蹙而司馬公無懊悔意太夫人亦安之夫讓產焚券毀已濟物若此此固司馬公志行則然亦太夫人之微德有以成之也去司馬公之世忽忽三十餘年矣太夫人獨秉家政整肅內外摯提巨纖履屐裝齋縫紉補綴之事皆躬自操作歲時之祭蘋蘩無弗潔也伏臘之儲醴醢無弗備也嫺戚往還時節饋問無弗豐隆而周洽也性和霽與人言暖暖姝姝雖臧獲靡或凌諍視已出若妾媵所出拊育維一鄉鄰族黨有以急告者皆給其欲以去蓋其仁慈儉讓約已厚人歷數十年如一日積善蘊和以肇嘉祉其由來者漸矣於是太夫人年登大耄神完氣凝步履強健猶察察於家務瑣細如六七十歲時每誡子若孫毋廢學毋嬉遊以墮厥家聲今子榮敦謹有矩度務洪勗學工文登拔萃科有聲端甫亦英英百里之選其餘子及孫之出遊於外者皆翹然能自樹立所謂世其家業而光大之者非耶洪範曰予攸好德汝則錫之福知天之所以報施太夫人者蓋有在也顰輓旣懸頌禱交作務洪固能馳騁於文者必將補笙詩奏華黍以抒其孝敬之心以彰吾外姑食報之德桂頹老鈍拙無能爲役且追念吾室人相對之言已渺若隔世尤不能無所感於中所以



貿然爲此者聊以叙兩家姻好之舊云爾若夫岡陵祝頌之詞則有世之鴻文鉅製在

誥授通議大夫孝廉方正陳昉仲姑丈大人重逢鄉榜暨序  
誥封淑人從姑梁太淑人七十有九重逢花燭雙壽大慶

粵以牛女紀分星之野浮山實產丹砂禺堯稱毓秀之鄉潁川厥爲鼎閥葛洪鮑姥以福地而得  
仙祝融鬻熊惟南方爲多壽則有人倫璣鏡藝苑璵琳懿行炳乎日星精氣鐘于河嶽德門星聚  
光符乾象之祥吳廡風高偕隱叶坤貞之吉五韙來備媯姜紀兆于焦林 九乾錫釐芝檢騰暉

夫 義畫一門樸學四葉承華如我循仲姑丈通議公則其人也 慶桂從姑作續于公竺伉諧儔

好瑟靜琴遠溯結縭適逢周甲登康時之上壽慶嘉偶之齊年昔則馮煥炳其麻禎近則陳黃播  
其佳話公今繼之洵爲嶺表人瑞矣歲次上章渚灘仲秋之月爲公暨從姑七十有九雙慶壽辰  
南斗涵輝結璘炳曜紅荷欲語商酌鴛鴦之巢銀蟾乍升清澈琉璃之界于時鳴珂里彥攢弁如  
星高密門徒聯裾成幄承由者斟醴以醪攜藻者烏煒于彤黼爾眉梨戩茲頤穀 慶桂誼叨葭末  
實後輩行涵濡道助沐浴明教敬陳梗概用佐祝延夫五河之水導源於崑崙大澤之雲蒼蔚乎  
泰岱鍾祥有自伊昔爲然太姻伯述甫資政公抱黃中之德紹白沙之傳緣督爲經執古醇聽欽  
欽內行圭臬儒林公懷厥稟階溯其萌抵銀杏金桃之對聲馳艸日銅盤列饌之設遇異常兒既

志憑于研覃復性耽乎鍼縷柳瑋才技足了十人吳彪精剛能貫九變夏門有建校後生舉其世德之貽謀如此 國家重賓興之典人才爲祿仕之階公壯思泉流文譽颺發咸豐辛酉中式補行戊午科副榜同治癸亥入爲內閣中書舍人手抉雲漢回翔紅藥之階職掌絲綸出入紫薇之省方冀橫翔捷出跋履承明宣揚 皇風揆張洪業而公以爲列鼎之食不如負米之歡也乘軒之榮不如循陔之養也遽釋塵鞅言返初服時資政公方匏瓜獨處無嬖倖之奉元砂不餌惟蔬食是甘公承奉寢門嬉娛堂室爲曾元之養志敦廣微之補詩滌萬石之厠脩嘗漢文之湯藥迨三醫待謁百年抱痛劉通禱疾歲雖積而如恒崔悛居廬風偶吹而卽倒嘗以世俗二十七月釋服爲短喪爲父母服斬衰三十六月辯上儉集說之失斥齊宣短喪之非此則季路不除宣尼弗言其過制孟獻不樂檀弓獨美其加人者已其孝行之敦篤如此夫固性稟之踳駁亦氣類之滌池公則潔志蘭漸範躬模繡讓出廬之美繼軌薛包推困粟之仁希聲子敬盜牛穢行聞彥方而知慚繡被隨風見王忱而自媿陳仲弓化行里鄙汜稚春施及鄉閭履踐矩而輿方佩鐙玉而衡正卓卓焉醴醴焉可以式浮囂矻凌競焉其義問之昭宣如此宣統元年 今上御極 詔天下有司舉孝廉方正郡邑士紳以公聞名年老不赴試蒙 賞給六品頂戴鄉里榮之籠頭笑畫難迴宏景之心沈穎自甘竊慕鄭遨之表益信其高標鶴潔逸志鴻吳前歲戊午鄉榜重逢數科第之瓊聯值支干之周匝耆英盛遇縫掖臚歡招邀後輩以同遊棖觸前塵之如夢其遭際之寵榮



如此浮蓮石礪山岡並峙籬圍屏障形勝稱雄公居練山蓮塔之間前瞰魚石獅洋之勝室生虛  
白樨挹遙風寄逸興於邱樊託豪吟於江海天涯霜雪鬱工部之沈雄南國江山拾梅村之頑豔  
生平不妄交遊所就正者陳蘭甫陳古樵兩先生並皆鴻儒碩學峻望閎才莫不推錢起之擅塲  
稱王筠爲獨步翳多能夫游藝更擅美於臨池智永之筆禿者十八篋子雲之書習將三十紙蘭  
亭得其逸勢松雪貌其妍姿挾纈求書戶限恒滿其才華之超邁如此士生不恒陽九遭運螭蠅  
之臂徒奮精衛之願莫酬公韜迹謝危陸沈砥志九河瀨瀾都成注恨之波大地嶮巇竟乏埋憂  
之地殉修名于百世祝青松以萬年

公堂室遍詩萬年青以見志

命有常滄桑屢變願衡泌以終老飫詩酒以陶

情雖叔度量宏太邱道廣而眞長之門無襍澹臺之徑不由落落盧鴻雅號嵩山之逸超超元亮  
惟紀義熙之年黃綺可懷薛蘿在眼矣其節操之堅貞如此夫資政公以理學著公以篤行徵德  
洽人天澤溥里閭所由嘉徵宣豫協氣沕喬門庭雖離穢祥畢集以章善報疇曰不然從姑太淑  
人幼媚姆訓夙號女宗從祖嫩其徽柔諸昆頌其靜淑練布竹木綽綽乎戴風左輓右箴凜凜乎  
班誠井冰汲鯉潔奉蘭馨丸藥和熊勤襄庭誥繡塋挽鹿共頤耄耄之年霞島扶鳩互叶翻簠之  
奏立韋弦以示誠截葱肉以垂型壹德用彰母教是式喆嗣木君研精墳索殫心忽微早觀鄉國  
之光旋膺 廷試之選辭榮棘署息景邱園爲槐市之談經坐皋比之講席濟濟儒術祁祁生徒  
季雅虹姿玉輝神鋒穎發詠芹旂于蘋水簪彩筆于槐庭沈約則手寫簿書德林則神疲竿牘瓊

琚在室蘭玉森庭四世簪纓大其門閥老人顧之樂可知已慶桂與木君昆仲商榷文字流連觴詠紀趙母之佚行問元禮以排年書仿彥龍王褒媿其不學人誰崔炤裴佖發其狂言蓋月夕霞朝推襟送抱者有年矣今者杙榆秋滿弧輓光騰劉樊導其遐蹤鴻光峙其高節沐四朝之湛露鞠酒雙酣屹五管之耆儒莘筮載賦矧娥不夜團圓開天鏡之華仙侶長生千百益海籌之算試登堂而進巽祝洛陽並蒂之花欲掞藻以揚徽讓江夏無雙之筆

### 鄧筱赤宮保九十正壽徵詩文啓

吾粵山水以順德爲特秀而錦屏鳳皇金紫諸山屏列環繞乎龍江龍山兩鄉間陳獨漉張藥房溫賓坡諸名宿先後輩出惟蘊孕深且厚發焉愈光不墮益彰至於今則惟宮保鄧公應之宮保世有清德始以名孝廉任秋曹嗣其家聲旋擢臺諫建言國中要政恒見嘉納國家官制惟督撫能行其志惟御史能盡其言官御史者多願內轉而薄外任時宮保以諳熟名法簡放雲南大理府知府雖遠出無少失望意時賢卜爲大器旣之官勤心吏事成譽隆調任首郡途夷階升重增眷加旋晉監司陳臬全滇法平治成開藩楚吳上下輯和來悅而去思歷任安徽貴州巡撫綱舉目張每注意於察吏安民練兵興學表見愈偉蓋宮保才大於其官識餘於所事爲民興利而計及於久遠爲國防亂而鎮之於未然至若待人以誠自處以約正身率屬穆如清風在世爲難



數數觀也士大夫推其心與天下相見故所至人將仰焉而靡窮宮保宦績彌綸乎數省被其澤者人蓋以數千百萬計未竟其用畫錦歸里今鄉居又十餘年精神強固暇則以書畫自娛獨有關乎全粵利害治亂者毅然言之爲全省保障宜鄉人之蒙其惠而樂其永年也所爲畫深入三王堂輿復以所遊名山川潤色之性和易與之交者輒求得其手蹟聞畫家多壽若再逾十年以百歲人爲之當有更爲藝苑生色而倍足珍貴者 慶桂等建自治研究社於城西承宮保教者比平昔益密今歲清和月二十四日爲宮保九十生辰天以位祿名備諸身前年鄉舉重逢晉崇篇子若孫又皆卓然自立則海內之蓄道德能文章知皆樂爲之頌爰摭其畧而引其端凡諸名秩敬竢編後

### 招雨田九十壽序

代

昔歸太僕之壽晉其大也引洪範言曰予攸好德汝則錫之福以爲人之所欲天必應之富貴壽考康寧天也人皆推之於天箕子獨以爲人之所錫固以冥冥之中茫茫之表無所謂天者此言天人合一之理其說甚精惟必推原於攸好德則經之意義爲尤盡蓋德者福之源也福者德之徵也中庸言位祿名壽之必得惟於大德決之理固然也雨田招公今之好行其德者也僑居港中港之人無賢不肖皆以厚德稱之 成浩聞之稔矣爲叩其實咸曰公少賈於港言行恂恂然與人賢遷不爲量眩之術中西人士孚其誠信不十數年家道日起侈侈隆富埒名陶白親戚故舊

藉其力以致富者比比也而又建祖祠以敦族輸鉅金以興學創醫院以療疾修園基以捍患身處市廛而能士夫所難能之事其識量有過人者成浩敬誌之弗忘辛亥亂後解組歸匿迹杜門不問世事日惟讀書飲酒佯狂自放閒嘗以後輩禮謁公皓首龐眉步履堅勁所與言惟以濟世利物爲務無一語及時事者乃信疇昔之所聞爲不謬今公年益高德益邵子孫繩繩保世以滋大公惟安居暇食掀髯語以優游于青山綠水之間舉古所謂富貴壽考康寧者聚于一家且聚于一人之身其好德之食報爲何如語曰善言天者必有驗于人則世之稱公者將於天徵之耶抑于其身徵之耶而公可爲世則矣是爲序

### 黃鑄山世丈八十雙壽

懿夫羲圖軒錄之世民樂暝蹕堯釀舜薰之朝星流河渚春秋八千歲歷紀莊椿澡浴三十家泉甘邯鄲鞠稚川夫婦道演長生子晉丹砂方傳不老四皓騰聲於漢室八公耀景於淮南祈淪葉芳常春藤古然皆搜奇金石比算松喬爲畸人詭誕之華譚匪儒者壽臧之正軌惟我鑄山世伯光祿公魯國靈光楚庭耆舊巍巍德業樂石紀其勛奕奕門風鳴珂表其里惠澤旁霑雖寒冬而煦春輿誦喁於雖越時而盈野隱德覃遠機祥欲臻挽鹿同歡與鶴儷算八秩悅耆四初攬祥洵史乘之繼譚搢紳之盛事已歲次屠維協治建子之月爲我公暨世伯母崔太夫人八十雙慶壽辰



葭吹六琯開靈晷於駿狼<sub>王</sub>獻雙環鏤祥紋於龍雀揚舩者踐閭影纓者躋堂醴醪湛甌紉奏  
雅相與鏤淇園之竹賦北山之萊被<sub>希</sub>洪芬邳張大矩謹從末座敬上徽言夫忠孝有後明德必  
昌載繹琅編无待煇卜公懸鈴協夢浮磬表瑞南郡知爲英物惠連豈是常兒當太公臨敵捐軀  
之時正我公浣浴襁籍之日少失乾蔭長戀春暉阿<sub>焄</sub>和丸勵華原之學嬖<sub>嬖</sub>繼繼<sub>衞</sub>成彥正之名  
揚厥先芬激茲嗣葉是公之世德道咸之間 朝廷整飭旗兵森嚴軍制詔 下停止各省駐防  
文科公投筆興唱請纓勵志廼膺秋薦仍留粵防簡鈐練弋挺姿惟<sub>榮</sub>初補驍騎校轉防禦遞升  
佐領擢協領歲僅十稔秩凡五遷駿步雲騫鴻猷<sub>猷</sub>舉漢置八校鄧訓特著威名晉十六尉王攸  
允恭法憲士卒懷畏台府賞譽是公之宦歷無何法越事起羽書旁午大吏稔公才以公會統洋  
操命督練兵籌備前敵於是抽<sub>鵠</sub>兒之軍結<sub>猺</sub>之隊作參軍蠻語爲朱輔譯人<sub>鸞</sub>長孫霹靂之  
弓矢流隼羽<sub>燕</sub>張古<sub>驚</sub>之銃焰扇狼機金海玉函董承師其軍鑑六韜三畧黃石轄其陰符我  
軍既張穹夷斯竄是公之武畧 國家定制分設旗營任以長官理於民事公曳軍中之儒服披  
閫外之春秋譏盜<sub>侵</sub>指渠畫瀆都亭<sub>饒</sub>粥流瘠賴蘇道路褐衣善達斯<sub>豎</sub>又以民智榛塞學殖  
荒落爲之闢講肆宏教育矩模規策用束其行檢鼓篋<sub>肄</sub>正咸樂乎繩承<sub>淪</sub>溶新機<sub>萌</sub>拔舊染才  
俊蔚起纓弁彪騰是公之政績夫知足之旨老氏闢其鑰樂志之論仲長暢其風宦海辭榮殿關  
習靜闢蔣<sub>謝</sub>之三徑築<sub>庾</sub>信之小園維時海宇承平太和翔洽鄧中丞華熙易農部學清等早謝

朝籍寄情林淑遂與結尙齒之會踵迹香山登耆英之室抗懷潞國星初露晚結鳥抽觴靡扶孔  
光之鳩時觀香國之蜡是公之志行所尤難者我畿子佩共樂乎雍熙壽母令妻式歌乎燕喜世  
伯母太夫人鷄辰夢警雉衣篋弢洗手作羹恭羞膳紡機自織樸畧羣釵頤肅祀而薦馨黍娛賓  
而設饌全忠軍府參佐功勛李衡丹陽知還郡尹駢輿笑矧頤養長齡而且禮溯結璣歲逢周甲  
東公西母駐瑤島以齊年織女牽牛對銀潢而並壽問瑣窓璧月猶是秦時詠綺歲玉台今偕華  
首洵足與安定學士榮陽相國嬈厥嘉猷繼彼前軌是公之家瑞天懸黎結綠珍毓璇源蕙蘭芝  
草靈舒坤軸鍾祥非偶惠迪有基哲嗣長君宣庭星使藻質金融英才圭挺翺翔丹地祥書五朶  
之雲跋涉星輶遠使重譯之國博望偉烈攷時地而已殊臧洪異才問土風其能識用能標英絕  
域輯睦敦盤次君益三太守萃笙肄雅蕩竹分符襦袴噴其輿歌傳家懷乎治譜竿牘之暇劬志  
經綢貨殖有書翹明鉤距聚粲門子皆譽重玉龍濟濟門孫則座環銀鹿團圓四世簪笏一門尤  
足以懌晚志怡眉黎揚嘉徽肝景福者已是公之貽謀慶桂與宣廷盟同車笠情推襟抱滄桑世  
變嶺嶠帆迴登公瑾堂前拜馬援床下重話貞元法曲往事唏唏猶見漢代衣冠素心落落則公  
之所以福疇鴻罔變牒蟬嫣者理固然耶今者弧悅絢光雲霞麗香緬陶翟以怡顏頌劉樊之介  
祉錦屏千字笑書方朔蟠桃碧瑤雙擎願獻安期蒲節後長至三日芘蘭敷梅嶺之華祝二老百  
年嶢嶢聳羅城之築



恭祝誥授振威將軍 誥封榮祿大夫鑄山年伯姻大人德配 誥封一品夫

人 疊封一品夫人黃年伯母崔太夫人八秩雙壽重逢花燭大慶 盧乃潼代

壽考爲道憲之符契長生可斬伉儷實倫紀之權輿偕老是貴篤本覃澤則讐報隆矣葆蘇膏神則倡隨永矣貴禺奧區川嶽神秀浮山壽草五葉三經灝泉仙蒲一莖九節萬家鑽燧引葛洪之丹竈百里挈瓶溯何姑之玉井涵孕精爽代有瑞人先後若馮潛齋鄉賢若樊昆吾大令若伍星南封翁若陳石樵部曹皆千支再週發簪共樂家乘紀實章縫挾芳鑄山年伯湖海奇氣風雲騰躍懸車晚歲口碑載塗際一陽之初生逢八豔之雙喜回首憶玉臺之聘齊眉均絳縣之年卓絕勛勞合牌幌算若論福澤突邁羣賢矣請敬其概當石麟誕生之日正黃龍榆約之年狼機震天鷁船橫海太年伯榮祿公裏瘡奮戰瞑目猶視眷呱呱之在抱決疑疑之興宗太年伯母王太夫人茹檠耐貧折髮示訓母也天只殷斯勤斯 公勗業於青箱絜養於朱萼視無形而隱通眉語有深愛而奚慮色難遞捧壽卮空懽故戲其綵乞旌綽楔懷清再屹其臺圓穹味誠風樹靡靜燧穀已改屏鹽酥而悼心霜露旣降撫瓶 而灑慟終身孺慕純孝稱焉 公夙嗜學會奉 明詔停止文科改應武試旣舉於鄉旋補驍騎校升防禦遞轉佐領署步軍營協領掌左司關防兼八旗房捐巡警兩局普崇階二品 鸞誥遙頒潛裁黎萬人雀翎特錫其兼統洋操也編口號以齊

步伐習用英文改國語以易衣埃是尊國體將軍下令同官結舌 公指揮若定叱咤自雄酌天  
地人三陳於兵書一洗魚麗舊式譯遼金元三史之語解不煩貉隸專官法越擣兵沿海騷驛疆  
臣念鱗介犬羊之族不可無震憲加也念虎貌熊羆之衆又不可以凡庸馭也特令選精銳備前  
驅壯夫當關強鄰沮氣 公之才武窺豹一班 國家長白龍興遼陽虎步九邊勁旅六郡豪家  
咸執干戈願備鞭弭隸分防各省仍列八旗東遷盡良將之家北郡是大人之種唐設十六衛遜  
此森嚴周號三千人媿茲聯屬廣東川原包絡齒類繁衍太倉之粟不飽水衡之錢易空惟 公  
酌盈劑虛捐贏蓄羨俾婚嫁有助生育有養緘繩編枿之需有備欄衫鏤院賞以辦裝之錢短檠  
寒窗繼以焚膏之費復立兩旗義學英文學塾儲璧裁章之彥蔚爲鄒魯佩觿舞象之童置之莊  
嶽沃澹蒸灼滌除昏墊百廢具舉人存則興休沐餘閒則與鄧攸赤宮保易蘭池農部關精廬傍  
古剎觴罍引滿鷗鷺不驚追軌香山論文白社如李昉在洛都官還吳趙曦聯轡於制中端恪徵  
詩於粵嶠并名九老共峙千秋魏闕江湖神存富貴池臺琴筑消遙暮轡呂衡州有言身既安而  
思以安人性既適而思以適物今公後天下而樂先天下而憂儒將襟期加人一等夫榮祿公以  
精忠厲俗 公以至孝垂範天之所佑人之所輔豐福吉祿崇慶繁祉萃於一時疇曰匪宜德配  
崔太夫人菊坡衍派蘭閣毓秀慈惠昭則婉孌合誼手膳江膾侔孝蜀龐身操廡曰凌暉漢孟庭  
除洒掃陶令之徑不荒僮僕便令王裒之約弗酷有閨望焉壺德焉喆嗣宣庭星使木天翔步蓬



山傑直捧珠槃於義國持繡斧於秦疆譽滿華彝心存廊廟益三都轉蘊高騫遠峙之志負四窻  
八達之才虎榜書聲麟洲樹績秩儕於李固助懋於王襄其餘孫曾蘭森玉秀公掀髯點額樂也  
何如惟長至添線之辰值二老稱觴之日溯結褵之始甲子重週逮釣璜之年庚辛共守天河瑞  
彩壽星合併黃姑陸地神僊容成宛偕素女長生之藥不餌連理之松後凋厥孔雀之屏拜鴛鴦  
之社金絲奏廡巾纓充庭乃灌係屬年家子又申之姻婭備聞穆行敢陳頌語嶺表梅花十萬樹  
凌冬敷并蒂之葩海上桃實三千年獻瑞佐同牢之宴是爲序

### 募修鼎湖山慶雲寺啟

蓋聞瑞雲凝蓋金瓶開鍵閣之增寶月騰輝珠塔啟祇洹之剎虎林墜石證慧力於華嚴龍樹衍  
源暢宗風於檣<sub>標</sub>是以敷和訶之寶樹大海潮迴叩靈闕之玄扃寒潭雲覆碑傳廣福珍賜能捐  
名記等慈沈災待拯載瞻靈宇式振禪宗鼎湖慶雲寺者經始于明季之時重修于咸同之際枕  
倚巖壑縈帶河流樹絡多羅春茸繡竹七重欄楯芬流雕縷之檀四雷飛簷日晃鑄銅之瓦梵茱  
園畫檻目蘭規香積山高雷音巖護簷<sub>窗</sub>十笏共參彌勒之禪芬陀七莖密覆勝音之界一千三  
百衆住揭陀鹿脇之山八萬四千門持普覺漫漶之偈洵祇樹之淨土爲極樂之仙都而乃運逐  
三災地淪十劫付華林于半炬火燭西隅薰法苑之眞修衲藏東壁旃檀作供歎佛殿之灰餘貝

葉繙經聽梵音之風咽璇宮紺宇溯洄于三百年前忍草悲花感慨于萬千劫後欲棲禪之未穩思聚石以何時倘復舊觀須發宏願敬告善信同結勝緣演尼邱化玉之符說者闡布金之法庶幾投花盈鉢香凝陀衛之宮施藥成林金滿伽藍之苑寫于闐之妙相盡供龍龜現舍利之全記重開鹿野對仙庭而護法依寶界以資祥僕言歸故里偶作勝遊從丈室以談元應戒壇之索身前身可證曾參金粟如來善果有因誰是祇陀王子聯爲嚶引敬演蓮宗莫囋讐言伏遲檀施

### 廣東地方自治研究錄序

天下大勢有憲法之國國恒強無憲法之國國恒弱英倫發軔於始德法接踵於後而瑞典而葡萄牙比利時則繼之而日本則又繼之俄窘於遼東之役則又繼之大地搏搏時局僂僂此亦天運一大轉機哉今 天子下 明詔定立憲寰海萌庶延頸望治於是天津首創地方自治研究所江蘇設立豫備立憲公會若閩若吉若鄂以次遞舉而吾粵闕焉未講是則士大夫之責也天自治悖之學理之法則不折其緒無以盡通變之宜不正其軌無以杜陵替之漸紊焉則謬悖焉則亂其大較然矣顧歐瀛諸政治家或偏注政府或責重社會其立說互有異同卽其所謂折衷至當者亦有宜彼不宜此之病且中外異勢國力民質異致挈他族之成法證吾國之土俗必有齟齬而不相入者叩槃捫燭刻舟膠柱徒取詬耳粵東濱大海宅南交爲東南一大都會當乾嘉



盛時通商互市海舶鱗萃百貨駢闐故開通風氣爲最先講求外國之情勢爲最習時會變遷風俗頽靡跡弛之士輒拾西俗之唾餘以陰縱其詭隨之術而諛辭邪說遂橫決而莫有紀極以云自治固憂時者所怒焉傷之者也爰合同人組織斯社以研考憲法爲體以編輯地方之政治調查地方之政俗爲用立社省會定總匯也聯合各府州縣期普及也外達於京省仕宦遠布於五洲華僑則又廣智識資切磋也易曰探賾致遠孟子曰經正民興其以維世道而正人心以仰副朝廷期望之意而肩國民之責任者其在此乎柳氏宗元有言視都知野視野知國視國知天下則斯舉也殆合羣進化嚆矢歟爰述其緣起綴於簡

### 楊母傅太夫人傳

歲壬子慶桂歸自京師避亂香江楊星垣京卿居相近因審其先德甚詳今修家乘屬爲太夫人立傳京卿二十年前舊交也雖不文曷敢辭太夫人姓傅氏番禺人父文廣素有隱德太夫人幼淑慎言動一嫻禮法年二十歸贈公吉士公時王舅及舅姑並在堂太夫人孝事惟謹贈公就館恒在外太夫人以身代子職凡賓祭補苴饔饔之役一任其勞母 太君遣婢代之太夫人曰勞婦職也舅家素儉約無婢媼今有之是奢縱由我始婉詞謝母人皆稱其賢咸豐甲寅賊迫粵城舅安民公以領催率兵堵禦奮當前敵吉士公亦解館相從每戰以身翼父七月二日追賊及棠

夏村遇伏同時陣亡耗聞舉家倉皇慟哭既馬啟微又戰歿馬爲安民公婿公女許字焉至是復哭請往持夫喪太夫人以子然一身坐困危城卒遭奇變上慰老姑下遣小姑雖匆遽無失禮者事稍定太夫人曰忠孝之門宜有後諸子今無父責在我既少孤宜務學幸有成焉由是遣京卿入學同文館勗以刻志勵行毋墮先人志業及以道員分發廣東又勗之以處事愼勤立身廉潔爲居官之要比奉使日本太夫人已前歿其所以振國體惠僑民者猶秉太夫人之遺教云梁慶桂曰同光之際吾粵由同文館學成而持節使外國者比肩蓋相望楊氏兄弟人皆知之而孰知京卿當日遇之艱家之苦邪太夫人勞人矣日見其家之隆且以壽終京卿敦歷中外蔚然時譽皆太夫人所心慰者也雖然有其母乃有其子然則世之撫孤而思有成者宜何如也

誥授榮祿大夫光祿寺卿先考召民府君行畧代

嗚呼自先府君奄棄藐孤忽忽七年荒迷閔凶精體潰佚見似目瞿聞名心瞿每一念至忽焉忘生昊天不弔重罹酷罰同產兩兄相繼徂謝追惟府君生平之政績未竟之志業惟在不孝一人敢用儉生視息濡血吮筆詮次行實以告世之立言君子賜之銘誄以傳之家乘且備國史採擇府君諱兆棠字蘭仲號召民父號鐵盒姓黎氏先世家始祖公於時遷順德昌教鄉曾祖諱慈興贈榮祿大夫妣氏贈一品夫人祖諱應魁贈榮祿大夫妣氏贈一品夫人本生祖諱



應鍾江西鄱陽縣丞署鄱陽縣縣知縣有詩名著步蒙子詩稿贈榮祿大夫妣  
氏贈一品夫人父諱大成贈榮祿大夫妣馮氏贈一品夫人府君生六歲而孤先大母馮太夫人鞠教之督責甚  
嚴府君仰體母意折夕攻苦道光廿八年年廿二補縣學生咸豐二年舉於鄉逾年成進士又三  
年補赴廷試簽分禮部儀制司主事冬以前克復順德縣城功保直隸州知州十一年充總理  
各國事務衙門章京時譯署初設案牘無定式條例多府君手定酌中定議得大體至今爲法恭  
邸深倚之同治元年選授甘肅階州直隸州知州總署王大臣以辦事精敏奏留十一月保知府  
二年江撫沈文肅公葆楨以贛省需才奏調赴江西委辦饒州賑務厘繆去蠹吏無敢欺飢民以  
濟明年攝南安府事時行省遍地皆賊有大股悍賊由廣東復竄南安安人震駭相率出城遁  
城中戶不滿百守兵尤單弱府君議先奉母出而身與城殉太夫人泣諭曰汝受國恩吾義不  
可去當與城共存亡以身守不如以家守也府君泣受命八月初十日賊衆大至攻城急薄城  
環攻旌旗耀山谷勢急甚府君親援桴鼓守七晝夜太夫人亦親煮糜粥餉軍且出簪珥以犒故  
人人爭奮圍解事聞奉旨黎兆棠之母馮氏深明大義教子有方特恩賞給二品封典并  
賜教忠勵俗匾額一方府君感激恩遇益自奮厲圖報稱四年晉道員賞戴花翎秋總辦靈營  
糧臺靈營爲鮑提督超所統軍驍勇爲諸軍冠至是調八千人赴甘肅萬二千赴福建赴隴一軍  
抵湖北金口叛回南昌索餉三十萬聲言與閩軍合而調閩一軍亦因糧缺沿途搶掠同趨贛州

省全震動官吏駭噤府君乃挺身前爲宣布朝廷德威順逆感切輦動兩軍皆貼然遂赴調轅撫劉公坤一微公事幾不測昔昌黎面折廷湊明道慰納壇卒殆同此膽畧矣是年冬署布政使明察嚴整吏治以飭明年丁先大母喪歸服闋英中丞桂奏調赴閩八年署臺灣兵備道臺灣地懸海外人多飢餓不法諸生好出入官府暴橫鄉曲府君曰此輩未知聖賢義理朝廷典律耳有司罪也爲刊 高宗純皇帝臥碑文朱子小學以授諸生讀建玉山書院藏皮古籍令生徒絃誦其中漸漬薰陶士習丕變民尤悍戾凌弱寡率爲常其下戶寒門輒爲強宗所虐害一夕或至戕夷數十家名曰紮厝土豪吳光英最猖獗執殺之革弁戴捷春誣富民從賊株連甚衆府君視牘白其冤而治捷春以罪臺民皆感泣林文明者死難林文察之弟以兄功洊升副將淫掠悍暴強脅人財有司莫敢詰距阿罩霧爲窟穴結太子會聚死黨出入以兵械自隨嘗逼駐彰化縣城將謀不軌奉 旨嚴密查辦時文明羽翼已成若聲罪則必叛臺城且不保府君佯稱其才必將大用計遣其黨使他出乃置酒高會揜執之磔於市遠近驚以爲神副將蕭瑞芳卽夷亂肇端之蘇阿成也後改今名煽夷將巴夏禮攻粵攻天津署任安平時復通夷酋來攻逼江 至死滔天虐民中外憤怨白於大吏誅之臺民喁喁稱快外夷覬臺久自安平用兵後蔑視華官內地奸民復倚之以訛法地產樟腦最盛厥稅重夷人每販腦出口皆越關瞞稅官吏不敢問府君執公法治之英駐臺領事糾廈門領事力爭且調兵船到臺恫喝百計府君屹不動據理申辨英人卒不



得逞厥後有再犯者縛而杖之夷商酗酒犯官治如律各國領事知公強項皆不敢較外夷在臺知有中國法者自府君官臺始在臺三年內防民奸外禦夷侮形勞神瘁得不寐之疾十年夏引疾歸十三年日本藉臺南生番之亂調兵入紮琅璫意存窺伺沈文肅公奇府君才奏調赴臺總辦營務府君博採輿論遐稽地勢上書沈文肅公及政府畧曰日本此次犯臺原利後山物產意此地爲我荒服如黑龍江之庫頁島不甚愛惜可以任便取携因而截斷南北逐漸開墾我調兵至則彼事已集并執前道案牘揚言於各國各國欲收漁人之利多爲左袒實則彼國政令紛更人心惶惑詭謀漸露左袒者多不直之故初至時尙與生番接仗及我兵大集恐遭夾擊卽與番和厚幣甘言以餌居民并將各營歸併有自危之心臺南颶風時作實難泊船孤軍深入最犯兵忌且聞彼軍死病接踵糧米多朽腐察兵彼力斷不敢空國而出以分擾我海疆倭情雖狡識見不高不先佔踞後山止從琅璫進兵已落下着又其出師之名祇稱勦番外仍託諸和好我不示以創懲彼安敢輕於嘗試是戰不戰之權在我而不在彼我若執之愈力則彼受累愈深受累愈深則受撫自易昔兀朮駐淮飢困大言誑宋宋卽與和稍持之必無瞧類今惟在京則衡之以理不可稍事姑容在臺則臨之以威不可輕於言戰臺灣爲七省屏藩此舉實中外安危惟明公力持之時日本在京議和方事要挾書上政府意遂定堅執前議日本卒受盟冬授直隸津海關道明年抵任時有俄德洋商以完納稅銀補色參差挾領事籍言生事府君詳引條約一再折之夷

人知難罷屢奏記合肥李伯相常熟翁尙書

袁侍郎其要旨在籌定餉練重兵諳國勢盡地

利勸農工保商務教格致諸大端均有先見十月霸涿八州縣河決被災戶口無慮數十萬府君捐俸置棉衣米麥散給灾黎全活無算光緒三年山西荒李伯相鴻章曾忠襄公國荃委辦賑務晋省山路險峻艱糧運井陘一路最捷而盤鬱嶠岵不通府君上于大府奏請刊木濬山道以關至今官運商運皆利賴之晋民稱便武清縣鳳河漫溢十餘里爲患已及十年屢修屢決河以西比歲歉府君出俸錢助工疏濬完築河流順軌民慶安奠十月奉 旨賞加布政使銜十二月擢直隸按察使 陛見日 上垂詢臺灣情形日本軍務條甚悉稱 上意有熟諳洋務之 諭未

抵任 調署布政使數月病歸五年

賞三品卿銜督辦福建船政甫至督修戰艦變通西法堅

緻倍前以西學堂爲船政命胙選學生嚴課程多所成就今粵省西學堂章程四十條皆府君所參定也八年補光祿寺卿仍督船政如故尋因怔忡病發上疏乞休蒙 恩賞假兩月明年春病

劇罷歸十年法人攜釁廷臣交章以府君才能薦奉 旨

陛見旋 命在藉辦理團防比和議

成而府君遂不復出矣府君先後假歸里居者十

年務以敦厲風化輯睦里黨孜孜惟恐不

及所居昌教興

等鄉名爲三十六鄉皆以馬營圍爲屏障堤圯沙淤沙涌大涌口兩鄉復

築石壩激水水勢湍急圍益不可治府君白於省吏毀之光輝爲昌教下流築柵遏昌教水昌教受患構訟者三十年府君勸諭之補費柵欄鄉人稱便新會陳白沙先生釣臺爲豪族占毀府君



與衆紳牢執正議直其事撰釣臺碑記勒石垂遠每當時事艱難繫心 君國家居悒悒忠誠勃然人以爲有古名臣風也府君性至孝每體先大母馮太夫人好善之志故見善無不爲始祖祠湫隘告之族老式廓前後堂宇凡十 楹置立義田倣范文正公成法而變通之著于譜牒期功之親或貧無一椽之庇必躡屋以居日皆吾屬也戚里貧窮無告爲之計口授食等差有度歲月有常以衣以食凡百 十家其他贈葬費助婚錢建義學施醫藥築橋梁賑灾荒諸善舉又無慮二十餘萬金云生平無他嗜好自奉儉約雖貴顯無異微時與人交始終不渝故人子弟求謁者必勉以敦品厲學苟同時趨疊疊諄懇課不孝等其嚴每侍側輒舉馮太夫人守儉之說爲善之訓以相勗曰吾所以克自樹立者皆母教耳輒歎歔泣下不孝等亦泣誌之不敢忘天降鞠凶哀號莫及光緒十九年十二月十一日府君以疾卒於里第享年六十有八嗚呼不孝等其長爲無父之人矣雖欲再承訓誨其不可復得矣悲乎痛哉光緒十四年十二月初九日謹奉葬於番禹鹿步司楊梅嶺蝠鼠地之原元配繼氏 誥贈一品夫人繼配蕭氏 誥封一品夫人子三人長國庸國學生國子監典簿次國康附貢生光緒己丑科舉人花翎候選郎中 夫人出次國廉光緒癸巳恩科舉人三品銜候選員外郎 夫人出女一適同縣副貢候選郎中龍澤蓂孫孝讓

出孝詒孝譽

出孫女二

閩省業戶爲沙捐事上廣東督撫各憲公呈代

前奉憲示凡屬沿海沙田無論老沙新沙一律換領院照方准管業及頒發章程各等因田賦爲朝廷維正之供凡屬食毛踐土莫不踴躍輸將奉令維謹乃大吏觀成於上吏胥荼毒於下舞法罔利假公營私則有違憲章者三不便民者六羣情洶洶不能不涕泣而訴之大人先生之前一索驗糧串查章程內有契照者祇以呈驗契照爲憑無契照者方以糧串爲憑乃委員故意苛求於契照之外仍須糧串不知各鄉皆免差圖甲各糧歸戶長統納是合百數十丁爲一戶卽合百數十人而共一糧串也旣難分析自難分驗若一人驗契卽繳總串則同一戶之串必致呈驗多次驗一戶之契必致展轉多時示期促迫勢將逾限况委員又以其契串未符抑不與驗乎一發契留難查章程內驗明契照卽行發還乃十月以前繳呈番禺分局之契約一百五十餘起迄今兩月多半未發甚至將契藏匿誣以未經呈繳者胥吏沿以爲奸雷霆恐喝小民惴惴失業是懼是欲人之驗契而先以留契阻之則業戶之惶惑觀望抑有由也一不頒丈尺查章程內此次清丈田測量之法繪出之圖著明丈尺以昭大信乃委員丈量各田任意出入並不細勘量算多無準的而總局懸示凡經勘丈之田旣無圖繪又無丈尺無論業戶未必盡諳測算卽間有精於丈量者亦何由駁證其誤耶巧猾者則旣誤會憲意貪黷者遂藉此紛更此顯違憲章之實在情形也若夫食業之人情事各別或則遊學服賈遠適異地或則孤孀老穉城鄉迴隔或則展轉典



揭銀主他適此次清佃間未週知戚友陳告已需時矣况前此丈量未見牌示頃奉兩次牌示皆以二十日爲限公事例行先下分司分司頒貼又逾旬日是丈量驗契二十日之限僅得七八日之限也錄繕契照繪畫田圖復向戶長求取總串殷實者使令有人尙易集事貧乏婦稚舉措皆難就令逾期尙希體恤乃委員必執章程內兩月之限爲衡然既奉憲恩牌示展限則當以展限之限爲限矣况呈繳契照時一以字句少疵而不驗一以未有專串而不驗一以未有圖繪而不驗一以未經牌傳而不驗一以委員他出而不驗層層酷制種種吹求是迫以不得不逾限之勢而復以逾限罪之也病民者一清丈冊費每畝二錢香東各縣皆於換照時方繳也乃番禺分局先收冊費方准驗契及發還原契則蓋逾限違章驗不作據之戳既經繳費則不得謂之違章既經准驗則不得謂之不足作據語意含混強加之罪是院照之能換與否充公與否尙未可知矣病民者二查封田畝必須核實明示方昭折服而示大公乃委員封禁各田僅以一溢字概之僅以並無契據概之嘗有一沙之田封至數十頃一頃之田封至數十畝又有以數處溢出之坦併封於一處膏腴之田是何坵段不問也若何浮溢不問也有無遺失契照不問也有無糧稅戶口不問也截流而漁擇肥而噬則今日僅封百餘頃逾時將封至數千頃不知將此無業之戶如何拊循將此無田之稅如何徵收吾恐追呼在前餓殍在後矣病民者三廣東海國凡有潮水可到者皆可謂之沙田其實與通丈闔省田畝無異清丈之難昔人已屢言之康熙清丈一次乾隆改

章一次同治光緒又先後辦理兩次其時祇辦新沙不辦老沙非厚此而薄彼也老沙之田多有承自宋元以來未有易主者年代之遷移已屢契照之遺失必多官府之文券亦多有未存者核實纂難開端必擾官差衙役朋比爲奸鹿馬之指豈可勝言故清丈一行奸宄生心豪強越占三四年後訟獄繁多必百倍於今日矣病民者四照契學單同爲食業者之左券也照固爲真契與學單亦并非僞故僅以粮串學單管業者諭令補照可也以縣契管業者強之換照則不可藩照之發始自乾隆二十九年其不能盡田而有照者法制然也一照之田或因析產而分或因變業而分田分而照不能分其不能一田一照者又事勢然也國家無民田不許分賣之禁功令又無買一田必請一照之條同此田疇同此價買同此炳據何以或則換照或則不必換照其輕重懸殊若此或謂法制原可隨時變通不知歷次辦理皆嘗變通章程矣亦未聞有一律換照之舉歷朝辦理之案旣不足以信今則今日奉行之案自不足以信後倘繼此而起者又議行新式督照新式部照小民果何所適從乎同治光緒年間凡已頒補升部照者其乾嘉原承之藩照猶存若辦理未善則沙棍以前照影射分期瞞驗再領新照是一田兩照官不知也十數年後起而與隣右相爭令尹賢明恐亦無從究詰矣病民者五買賣產業赴縣印契此定章也乃有以今年新印之契呈驗者委員呵斥屏不與驗若謂印契爲僞則縣官竟亦誑民若謂印契不足爲憑則朝廷不必設律若以其係屬新契并非舊契則清丈以後未經撤局以前皆不得買賣田畝矣買田而



不印契則有罰買田印契而呈驗則亦有罰買田不印契而呈驗將更有罰天荆地棘非猛於虎乎病民者六夫業戶不必盡殷富也女戶幼丁藉數畝之田以糊口者所在皆是一紙官契性命以之託人則度受棍騙不繳則恐至充公襁負提携號泣呼天莫可告訴故目下殷戶之受累自不待言而窮苦之民被禍尤烈四鄉父老涕泣相與言曰自聖清二百餘年以來無此苛法耳事勢若此其煩吏役若此其酷貧民若此其困沙棍若此其擾此不便民生之實在情形也且夫國本在得民民生在恆產有土有人此經訓也方今海氛孔亟索費據地日益憑陵正當收結民心培養元氣奸民煽惑久矣仰賴列聖薄賦輕徭皇上深仁厚澤業戶等久戴國恩喁喁化日耕田鑿井亦庶幾盛世之良民乎不爲作奸犯科不爲抗糧匿稅薄田數畝俯仰是給乃無故而封禁矣無故而罰鍰矣無故而召變矣禹甸咄咄誰非赤子而吾粵獨罹此厄哉士食舊德敢有怨尤萬一不逞之徒挺而走險藉異教爲護符援外夷以要挾是爲淵鰲魚爲叢鵲雀也昔桑宏羊孔僅競言興利而漢政以敝宋王安石議行新法卒以延害一時貽譏千古大臣體國經野不可不深長思也吾粵旱潦連歲農民失望鴻雁嗷嗷待哺聖朝愛民如子議捐議賑惟恐失所業戶等同在覆轡之中何以買業不能賣業又不能食業則更不能顛連困苦以至於此極也督撫憲殷殷求治保又蒼赤或未洞悉此情耳鄭俠流民之圖雀或復業之請非鄉先生之屬而誰屬哉謹用瀝陳伏乞大人先生上達督撫大憲庶幾於籌餉之中仍寓恤民之意毋徒爲竭澤之計必思

爲經久之謀酌理準情與民休息則地方幸甚斯民幸甚闔省業戶公呈

### 倡辦鐵路啟

光緒二十八年辛丑

嶺嶠以北延袤數千里以至漢陽關河阻深舟車勞瘁商旅之難自昔然矣張觀察弼士上承  
朝旨下思民艱擬建粵漢鐵路以接軌蘆漢統宇合之全局規中原之大勢管樞楚越控制東南  
恢乎大觀也太常寺少卿盛公表其才于朝使總厥事觀察於是借洋款招商股聯絡中外始始  
集事可謂能矣迺或拘蔽之夫持一孔之見以爲事繁功鉅易駭民聽不知英據九龍法割海南  
灣虎狼偪處耽耽覬伺久思窺我堂奧攘我利權失今不圖噬臍何及况吾粵運處邊徼外瞰重  
洋地狹民稠穀米匱乏歲時荒歉藉鄰省爲轉輸姦充充斥視他省爲繁劇鐵路一行化巖疆爲  
康衢收邊鄙如腹地于以均物力利商運便徵調資戰守所謂形勢一連根牙永固者非歟急公  
好義之士盱衡時局必能相與以有成也謹拭目以俟

### 爲沙田加抽致朱省長公函

公啟者頃接五屬沙田業佃代表陳德生等兩次訴稱沙棍條陳沙捐每畝加抽一元經省會兩  
次否決計不得逞復改名目請咨省會另議賄買議員意欲強迫通過農民百萬勢將輟耕等情  
查粵省沙田據報紙所載輿論所言每歲租息收入正供雜費輸出兩相比較已去四分之一若



加抽一元則竟去其半矣考之各國徵之各省均無此苛例近年屢遭水患復罹兵燹鄉居則輒被擄劫田畝則勒派行水遷徙走避民不聊生在上者不能拊循之噢咻之惟日闕其所有而腴剝焉河夜自思常亦有患然不自安者況租息日見其減物價日見其增吾儕小人居何以自給休養生息猶恐不及其可強事誅求重滋之戾耶偏災水旱業戶則必須減租盜賊擾害佃戶則無從輸租而官府之捐輸未常豁免也而盜賊之劫掠未嘗少息也徒收保衛之名并無保衛之實民力竭矣民怨深矣使必如陳德生等所陳悍然爲之是迫全省于陷阱中也夫以議會否決之案復爲大拂民志之舉不顧事理之當否徒事搜括以府怨即使百計通過如公理何昔鄭僑致范宣子書曰非無賄之患而無令名之難又曰棟折榱崩僑將壓焉桂等竊附此意用特貢其愚誠唯執事垂察焉

### 致張堅白制府書

公啟者粵中風雅盛稱南園明初孫仲衍王仲翔黃荔灣李仲修趙貞伯五先生嘗結詩社于此迨歐崙山有五懷之作因與梁蘭汀黎瑤石吳蘭皋李青霞復聯吟於抗風軒所謂後五先生也陳文忠公敷藻揚聲雅續前軌風流文采稱極盛焉康熙朝番禺令李公建復抗風軒列前五先生而祀之乾隆朝郡人士請以後五先生附祀顏曰南園前後五先生祠蓋由來者久矣自是以

來方聞之士輒觴詠其中每當熙春凜秋霞朝月夕招邀朋盍縱論人天携徐邈之酒鎗門江洪之詩鉢古歡易索良會有常不知其有興廢之感也廼張安帥督粵假其地爲圖書局冠蓋往還吏胥雜沓文讌之舉寂然無聞旌節蒞臨闔郡士夫因以規復爲請明公慨然許之廉訪秦公備文移交成案具存士林頌德歷久弗衰辛亥亂後綱紀蕩然堯溪下於鹿臺詞壇荒於馬肆士習頹靡風化凌夷世道之憂怒焉如擣今值使星重蒞甘澤敷布遐思舊德敢申前請伏乞查照原案仍將南園移交并飭令圖書印刷等局遷移別地出示立案昭茲來許庶幾先賢遺蹟亘古不刊續香火之前緣成騷壇之韻事扶植名教丕振宗風高風勝情曠代若接修函創牘惟有主臣

### 致唐少川委員論沙捐書

頃聞人言中山田畝每畝收實業費二元不禁驚駭錯愕喟然嘆曰民食盡矣香順東番大概每畝租銀七八元之譜此爲上等田其中等者每畝約五六元下等則四五元而已可以細爲查考計也中山上則民稅補征升斥鹵稅俱照番禺上則每畝納糧約三毫半舊賠欸捐三毫半俱業戶肩任其護沙費每畝一元二毫而本沙鄉中自衛費八毫

各沙不等

主佃各半先以此四項計之業

戶輪納一元七毫今又收實業費二元共三元七毫矣而政府之軍需費三毫

前年有抽

學費三毫

十六沙 西海及亭 角洲各處有抽

報冊費二毫佃戶之收基費整糧費歲歉減租費又皆取之於業戶餘租數元之



內如何其可支且鄉賊紛擾則出省賃居築路拆屋則隨處賃居每月賃租費至少四五十元而米柴蔬菜百種物價皆較前二十年高漲十倍區區田租如何其能支大概世界之中貧人值百之九十二三富人僅百之六七耳悉索敝賦靡有窮期必欲盡人而驅之陷阱之中必非仁者之用心第未審察物情以爲食沙田者皆鉅富耳大約兄弟數人同食一業以分租孤兒寡婦專靠一業以餬口者實值多數若夫順德之青雲社東莞之明倫堂沙灣之留耕堂則不在此例至各處之秧田如貝底水深淺沙溝多係植蔗東莞蕉田各縣菓園則租項頗高是當分別觀之不能執一以相例也執事經世宏才牢牽六合必能知農業之情狀閱民生之艱苦不以耳食者惑其智而以心惻者行其仁敬懇會議時闡發正論秉持公道毋事勒捐以抒民困桑梓幸甚

### 復梁節庵書

涼風颺溢秋陰黝黝蟄伏斗室瑟瑟不甯猥辱惠翰恍如覩面文采瑰麗詞意懇懇出入懷袖企想淵深足下諄三古誼湛深道腴扇玉局之遺風成丁恭之講義柳垞才技足了十人季長經師洞貫九變且羣羅載籍釐定課程枕經誦典廣厥咫聞規策矩模繩茲內行他日河汾弟子雅號通儒高密門生咸稱樸學此則謝山碩宿曠代若接端敏直臣異世同揆者已廢桂含懷風樹未奠松楸乃因讀撼龍之經徒負窺牖之見山靈嶽嶽迴囑已非居諸攘攘展齒徒折慘言負土良

增哀恨麥地舊塋時論參趨有負摯誼如何如何承惠石刻數種摘字皆金凝楮成玉置之座右如升太學之堂懍厥箴言恍聆宣尼之訓浩浩江水滌我肝腸落落英風助茲瞻目勉挹嘉惠敬拜明德率爾操翰未及詳報鴻風若便再惠端綺

### 與康長素書

零露警旦微雲澹秋閉門窮居倏廢旬月悲緒積寸時作寒鳴遊絲盈丈頓涉遐想微波蕩葉映樹猶紅涼雲流月照地成白感歲序之寥落重素交之合離美酒十千朋盍三兩縱步林野尋彼幽響憑弔滄海盪此遐矚坡老之詠或分四時景畧之談上挹千古緬懷此樂益念吾子夫雲龍上下取喻乎東野雌霓連蜷發賞乎王筠楊子云翕其羽朋友助也唯吾與子南鄰北巷衡宇可望來牛去馬塵事相接相思不見咫尺千里有懷如何

### 上潘嶧琴先生

甲歲曾上一書託長素轉達時長素以烏臺之案爲獨秀之遊人事變遷此書恐付浮沉也山川超緬寒暑遞嬗遐思結轡積日爲勞春風扇物扶翹布華君子惟宜福履多豫甚善甚善執事朝翔禁省黼黻承明馳兩浙之星輶步八輒之日影總擧英偉揆緝文獻固已衆流仰止羣論歸高謝榮朝籍養疴林嶽午橋別業香山勝社不速之客攝齊而來問奇之酒聯軌斯至古銚瀾名訂



陸羽之茶經霜盤薦紅編鄒平之食憲調浴元素頤享天年佇想清暉何嘗不眷慶桂少秉愚慙  
長寡學識父書徒讀門地多慚驚蹇無致遠之用短翮渺凌雲之氣撫躬循省惟增累歎塵事填  
厓家累駢迫東里縞帶誰爲贈貽西華葛帔自感淪落欲竊斗祿因作枝官周處入吳伯鸞適越  
江湖滿地萍蓬一身僚黨渺歡綿攀無倖向栩之舍萊蒿塞門杜陵之居青苔及榻卉草應候時  
鳥變聲感歲序之推遷嘆人海之飄泊且疲疴淪躓有似重規潦倒蠹竦竟同叔夜藜藿之草豈  
爲糧棟橐鹿之性難施鞍轡匪閃榆以還時徒離蹤而跂警儕輩貽誚知爲何如人耶王微之宦  
情本淡坡仙之結習未蠲秉燭雖遲握槩猶奮儻將射策天邑騁志雲衢所冀錫以鍾珌發其豐  
臞則鞭策疲恭老驥或堪千里搗磨朽鈍鉛刀庶幾一割是所望也何幸如之謹因風便聊布宿  
心

### 復宋松存書

承教并示感懷詩一章靈輿獨闢雅聲遠姚鐵板銅琶寄遙情於豪宕金荃翠篠聊賦意於娥曼  
感大地之山河寫中年之絲竹結遐想於香草溶靈源于浣花讀以千周馨滿懷裏藏之什襲光  
溢縉繩桂才同疥駱學味踰鴟毬翼北溟迴颺蓬海長飢駟我薄宦依人願尋白鷗之江盟敢詡  
烏衣之門巷北風雨雪寒侵游子之衣日暮鄉關怨入征人之夢問揚廬其無草嘆江管之不花

忽誦英篇頓增好事君虞句好寫作屏風劍南詩工畫之團扇真欲買絲而繡無煩擊鉢以催撚  
髭未工獵心已喜念履綦之未沫黨墜歡之可尋牙管十雙金縷一曲咏鴛鴦之兩兩君是詩仙  
賦芳草之離離我原秋士浮瓜沈李尙憶前游白酒黃花還盟息壤附呈和什伏乞郢正敬承動  
定不盡欲言

### 答沈廣虞太守書

損辱教命重承存注風誦再四委心無量朔風告勁伏惟君子福祿攸同甚善善明公以廉明之  
才任稽察之使饒稅之奸必剔其蠹檢覆之準惟平其衡補彼亡羊去茲害馬緬懷政畧欽揭良  
深桂客子光陰書生結習焮掌勵學莫下董生之帷舛心攻文尙愧劉三之筆雅欲驪首天路奮  
翻南溟而稚圭蹭蹬九試明經趙一奇窮六上計吏行滕萬里徒芒屨之勞人鐵硯十年竟毛錐  
之誤我瀟瀟風雨何處鷄鳴昔昔邯鄲久荒蟻夢撫躬循省良用累歎且重以憂患迫于號啼甫  
里無一稜之田江陵乏千頭之橘厄窮不怨敢卑柳下之官惆悵自憐久遂賃伯鸞之廡金閨亭  
畔問豪士以何人閤廬城邊歎雄風其安在聽風亭之唳鶴二俊祠荒酌江渚之寒流三高跡杳  
時或荻湖春柳笠澤涼波尋辟疆之故園說支公之頑石宦情翼薄感詞客之飄零鄉味鱸肥助  
騷人之歸興羈棲觸如何可任頃司征權謬事算緡隸首之法未嫻乎九章陽城之拙當署平



下考惟常懷武鄉之明訓誠宏農之四知以冀上扇清芬無慙素履猥承獎勉彌增愧慙盟心白水誓弗起乎微波晚節黃花願慎旃乎前路

### 與侯東洲書

一樽江月昔年纖素之詞百戰河梁今日芾棠之地停雲千里援琴寫其素心懷人三秋采蕭寄其遐想剪取吳淞之水結念河陽之花清覲莫申令德彌眷回憶秣陵舊夢題襟雅遊譚讌流連朋從稱屣布衣草屨訪種竹之名園茗薜爐煙坐臨池之小閣花氣蕩水灼灼午晴林颺招涼寸寸秋色甘霽乍歇則一水到門靈曜欲沈則衆煙合嶺聽毗盧之鐘梵仰鍾阜之岑巖橋影橫虹出眉畫黛相與開軒挹爽剪燭縱談商榷古今評量雅俗纏纏焉陶陶焉不自知其樂也夫易遷者暑緯候去而莫追至樂者盍簪難聚而易渙君方乘時以布化僕乃俛首以求衣蹤跡傑僂身世槎觸方今聖明在宇英袞亮庸執事翕張經綸噢咻蒼赤范滂名士雅執公儀斐儒術能歸吏治朱墨剖析既苛姚之胥蠲竿牘填厓仍嘯歌之不輟元結春陵之詠香山秦中之吟固已閭閻謳歌臺府賞譽而僕羈迹海濱徒閱過船

用東坡句

塵雖爲鷓鴣之吟竊窮鳥之賦以此塵欲生甌囊無選錢默爾以思迨然而笑行捐虎爪之板棄雞肋之官則將買艇十尺驅車兩輪訪君衙齋飯我官閣吟梅詩好應同何遜揚州橐筆人來或

可元瑜書記敬盟息壤無任主臣

### 與盧肅卿書

兩地縈懷一江如帶言念君子有勞如何驛使相逢問訊淮陰臺畔知己栽遍河陽滿縣花矣聽騎竹之新聲仍茂棠之舊蔭薰風扇物愛景宜人幸邇德隣願聞政畧桂監稅浦口虛勞歲月誦坡老津亭之句媿元龍湖海之才身世蒼涼未嘗不悔折腰思遂初也回憶秣陵舊雨鎖院秋風綢繆盍簪推送襟抱揚榷之雅寤寐乎孝芬譚讌之歡履綦夫孫晷朋從環妮固極一時之樂矣歲月云邁勞燕分飛每念前游惘惘如夢蒼波浩渺魚素可通敢期德音以當韋佩

### 與趙嘯湖

綠波春暖迎大帥之旌旗紅日西藏望五茸之城郭颺輪滾滾霞標掣鯨海之雲巨艚峨峨夜燭集鵷行之侶萬家燈火雲間第一之樓兩岸弓刀虹貫十重之壘執事以守土之令尹迎按部之元戎當竿牘之填菴爲故人之欵洽剪西牕之燭重話忻歡逐東野之龍有懷上下迢迢良夜揮謝塵以清談欸欸今情贈范袍而共暖乃以宦程有繼塵累還牽遂別晨衙遽移歸舸大江日落迷離柳色之時深院風迴開徧棟花之候依依昨夢渺渺余懷嗟乎東馳西騫徒落魄於江湖直



鍾蒙鏐敢希心於霄漢跡塵芻狗甘爲銘坐之銅人謂某不  
作一語手可搏鵬屹作南溟之鐵漢徽徧冠  
裳之列知己惟君徜徉簪盍之中周旋作我聊書鄙志藉博解頤謹謝雲情永鐫風義

### 致陳桓士

幸適德鄰飫聆政畧猥以文舉之世誼託張棖之神交景仰私忱欽欽在抱去秋餞鄧中丞於申  
江行館識孟嘉於廣座聆劉憲之緒言徽徧冠裳流連晷刻遽分襟襟惟增戀戀足下茂才亮拔  
風猷邁邁握珠冠月振瓊韜霞當法之譽遠迹平黃霸坐嘯之雅齊鑣夫南陽舊績新猷喁喁與  
論桂質雜丹黃材兼拳曲晏楹徒撫揚廬自寂鼓鱗思躍乃曝鰓平海門搏鵬欲飛竟綴翮夫霄  
漢李密衰薄旣感門祚文園貧病翻慕貲郎拙宦簿營折腰非恥而秉性愚戇動與世違麋鹿騰  
駕服鹽車而未能斥鷃習飛搶榆林而尙拙徇愁自晒陳祿獨前僚黨黜歡童僕匿笑以爲此跼  
蹐之士耳自維身世進不能騁足霄漢樹尺寸助以揆張於時退不能息景衡泌者等身書以聲  
聞於後飄泊宦海綿歷歲時悲歌叩天抑鬱誰語夫得失時也窮達命也昔東齊田峻遂攀附於  
明主安陵都尉終皓首於郎官是有數存匪可強致惟足下擅李虛中之術闢珞琭子之微謹以  
支千八字書上求爲推衍自傷馬磨已知運命之窮試演禽宮共參變易之理則讀月波洞中之  
記消息陰陽考玉照定眞之經權衡趨舍易曰窮理盡性庶無慥歎端函削牘惟有主臣

於各埠各省教會之西學堂不下百數若香港之皇仁書院上海之聖約翰書院規模尤鉅蓋一國有一國之風俗綱常倫教各有不同若使旅外僑民於祖國之文字語言道德習尚渺無所知則習外之見愈深愛國之情漸淡查北美僑民以十萬計彼此所得工值實較內地爲優除養事俯蓄外大半能担任學費惟限於教育無人不得不附入彼國之學校若能提倡激勸則中文學堂之成立可計日期况美國學校之多甲於他國科學程度亦以美爲最良我國學生凡普通畢業後欲習專門者尙須咨送赴美就學若以該處僑民就近附學其經費豈非較省惟慮其自幼卽入美國學校於國文普通未能諳習勢將楚材晉用不無可惜且恐歸國時授以職業殊多扞格擬請 奏派專員馳赴北美提倡華僑學堂俾僑民博通中學俟畢業後再入彼完美之學校或使彼中已習專門科學者補習國文則中西融洽造成全材足備 國家官人之選因勢利導莫便於此是否有當恭候 鈞裁謹畧

### 宣統二年上學部呈送美洲華僑學冊文稿

法律館諮議官內閣侍讀梁慶桂謹呈 爲呈送美洲華僑學冊事竊慶桂於光緒三十二年十二月奉 鈞部派赴美洲籌辦僑民學務旋因事請假回籍於三十四年正月下港二月五日放洋三月二日抵美宣統元年二月事竣回國順道歸粵均經先後電報在案查華僑散處美洲



者近日僅十餘萬人每埠多則萬人少或千數百人其子弟能入初等小學者或數百人或數十人大都生長異邦習慣自然幾成土著且又爲就近謀生起見故皆入西國學校而於中國文字反未講求其間不乏異才能在該國大學畢業者要以祇供西人驅策楚材晉用良可慨惜慶桂  
遍歷各埠接見紳董公讌私覲廣爲演說宣布 朝廷德意 鈞部懿舉本諸孔孟遺訓諭以

忠孝大義竭誠開導以堅其內向之忱僑民仰戴 皇仁眷懷祖國遠近傳播靡不感動雖間有

頑梗遇事阻撓而諸誅多端究不能搖惑人心而各校卒以成立此在美籌辦之大畧情形也由港動輪先抵檀香山旋駐金山埠金山爲美國疆域之西僑民流寓最早人數亦最多其公正純樸者固不乏人然多不任事此外良歹不齊是非莫辨劃分邑界紛立堂名意識愚頑號稱難治而各會館紳董謝林周三人非惟無識復喜生事埠中善舉多爲所敗壞此次辦學幸有二三殷富出爲維持故爾得所藉手然幾經勸諭幾經反覆計濡滯金埠者五閱月矣次抵沙加免度人心謹愿立學最先惟商務無多籌款頗形竭蹶次抵羅省技迭次約集紳董妥籌辦法而人情散渙徒事延宕次抵梳了哥連華盛頓凡此三埠皆以僑民無多難足校數惟以華京爲總匯之地公使駐節於此又值唐專使抵美故彼此互商欲在華京先立一校聯絡數埠究以距離較遠車費浩繁衆議紛歧遂多觀望次抵紐約籌商經旬開學禮成遂赴芝加高該埠商業繁盛而家族主義未除其結習與金山之邑界畧相彷彿慶桂於各姓之間幾經往來始能聯合故開學獨後

次抵砵崙舍路其人多懷忠愛於學務尤屬熱心著手較易繼渡海入英屬域多利俗所稱鹹水埠者也衆情歡迎從容籌議購地建堂蔚然可觀次抵雲高華自鐵路開通埠中商務日益暢旺舊有學堂爲之改良章程酌定規則均能遵守無生迂心以上八埠惟金山建堂一所可容學生二百四十人將來經費漸充多聘教習分時授課可容人數當更倍之域多利所建築與金山大致相同至紐約沙加免度芝加高砵崙舍路雲高華六處均暫租樓房一律開校此各埠分別辦理之大畧情形也興學要務首在得人是以前到一埠輒擇公正紳董與之周旋幸皆能相助爲理計金山則有陸步瀛劉興陸玉屏鄧廷棟黃金若而人紐約則有領署書記關慶麟李奕洽若而人沙加免度則有周鳳文鄭贊勳陳苒芝鄭天恩若而人芝加高則有梅宗周湯信梅麟耀譚昌若而人砵崙則有梅伯顯薛柏梅躍雲若而人舍路則有阮洽陳文周胡業棠若而人域多利則有李卓明李鑑濤盧椿年林禮斌若而人類皆獨具熱誠堅持正誼不避嫌怨力任其難此次各校之成實以茲十數人之功爲最偉其餘籌辦學務各員亦均和衷共濟卓著勤勞應請優予獎叙以示優異至各埠商董萬里經商終歲勤劬獲利無幾竟能湊集鉅資廣籌經費具見愛國之誠應請援照成案從優獎叙庶海外華僑有所觀感此出力捐資各員應給獎勵之大畧情形也開辦之始原擬中西並重經訂定章程刊刻分布惟據商董條議均謂教習人衆欸鉅難任白應審度事勢畧爲變通故現定學堂課程專以中文爲主每日上六時任各學童仍入美國學校



肄業西文格致算法下六時以四小時間教授中學約分經學修身國文歷史地理習字體操唱歌共八門惟學童程度不同人數多寡不一不能不因地制宜分定教授方法以爲裁併教員撙節經費之地每年各將成績呈報 鈞部及公使領事考驗以昭核實業經諭令各堂照行此酌定公課時間表之大畧情形也然此皆經始之謀仍當籌持久之計謹擬辦法敬爲 鈞部陳之一酌給常年經費也泰西各國凡事屬創舉力有不逮莫不由國家撥給經費贊助其成况建學爲興國要圖今幸成立僑民紛紛以補助爲請應請 鈞部每年補助金山學堂美金五百元紐約美金三百元沙加宛度美金二百元砵崙美金二百五十元舍路美金二百元芝加高美金二百元雲高華美金二百元域多利美金三百元量予 恩施方易行其干涉爲數無幾收效實多一嚴定校長攷成也僑民人心散渙現雖踴躍日久玩生擬請由 鈞部札飭各埠領事爲校長凡屬於該領事管轄者皆隸之酌定攷成自免推諉一歲派委員查學也堂務之廢弛教學之勤惰必須查驗以期整頓擬請每年酌派學堂教員或使館隨員給予川資薪水週歷各埠名爲視學員成績若何據報 鈞部事事核實學務當日有起色一給予教員學生獎勵也各堂俱名小學而亦間有三數人已有高等小學及中學資格者將來四年畢業擬請 鈞部札派使館隨員領事或學堂教員會同攷試如確有合於高等小學及中學程度者擬請按照內地章程給予獎勵其教員亦請比照內地從優給獎不限以畢業人數俾昭激勸一飭撥公款助學也金山有舊

中華會館一所由公使撥款建復當經明白批示以後該會館租息永爲辦學之用溯石示遠成案可稽乃會館紳董謝林周三人把持盤踞據款不交且造謠言肆行誑惑擬請鈞部咨行公使札飭領事照案提撥毋任抗撓以重公款此外各埠亦由領事勸令商董於公款內酌量補助紐約域多利已有成例當可仿辦以上五事皆爲善後之方是否可行敬乞鈞定總而論之內地興學所以濡民智而養人格海外興學所以收民心而保國權辦法不同難易亦別華民生長外國於西學不患其不通於中學輒苦其不習文字爲立國要素若國民而不諳本國文字者久則與之同化勢將盡成彼國之民俄於波蘭英於印度可爲借鑑今中西學術潮流所趨雖有相引漸近之勢而究其歸宿溯其本旨相去實遠僑民子弟耳濡目染相沿成習守此不變流弊滋多况近年邪說橫流遍翔海外莠言煽惑民志易搖惟多立學堂澤以詩書自可定其趨向民情國勢一彼一此正待轉移此所以挽回之策經久之謨尤不容須臾緩者耳又金山埠商民黃金現充美國王家郵政局員而傾誠內向喜辦僑埠公益慶桂歸國時囑其於已成學堂外再爲勸辦該商民已力爲肩任檀香山商民唐球見義勇爲慶桂兩經該埠囑令提倡勸導現接來稟均有成議將兩處學冊寄到擬請准令照章呈報援案給獎庶知勸勉藉圖擴充實於我國興學前途關繫甚鉅茲謹繕金山沙加免度紐約芝加高砵崙舍路域多利雲高華八埠學堂職務人員冊學生姓名冊籌辦學務紳董姓名冊功課時間表共八本內沙加度紐約域多利三本附



學務公所職員冊建築表員役薪工表購置器物費用統計表十二紙另金山學堂圖式六紙金山紐約芝加高硤崙等埠開學拍照四紙又勸學啟一紙擬訂中西並習學堂章程一本彙呈鈞部俯予存案另勸集紳董捐款冊約共美金三萬餘元商撥公款共美金二萬餘元尙須核伸中國銀數與籌辦出力人員一併請獎至領支欸目亦須列冊報銷容卽續行呈報再遊歷日記已將經歷所及考察所得分類撰著尙未脫稿隨後補呈合併聲明謹先將籌辦美洲各埠學務情形觀縷陳佈伏乞 鈞部察核施行實爲公便謹呈宣統二年六月 日

### 廣州新建節孝祠碑

館課少作

粵昔懷清台築巴婦傳苦節之貞絕妙碑留曹娥著純孝之懿自來孤松比操慈竹啣恩作坊表於枌榆邀寵榮於棹楫稽諸志乘振古于茲報以馨香於今爲烈是以漢王聞立義之婦邑以延鄉齊侯見有禮之妻封之石窆凡以敦序天秩矜式民彝聞淑行於璇閨揚清徽於彤管然則貞魂毅魄奠血食於崇祠潛德幽光表身名於變禮是之取矣亶其然乎此廣州所以有新建節孝祠之舉也廣州雄蟠羊石俯蒞魚珠分星躔婺女之墟再索叶明離之象名山清淑婦人之鍾毓偏多南海衣冠少女之鑑擊曾獻塘名投女蓮出水以難汚石號望夫栢凌霜而益健以故嫗嫗弱息茂四德以常馨孤露嫗嫗潔百行而無玷久矣稱貞縮屋無感吠厖防意如城不譏相鼠已

且夫從一而終者陰陽之定位也之死勿二者舛合之深情也當其袿襖相聯瑟琴在御賞如影  
響舉齊鴻案之眉誼洽刑干挽共鹿車之手我絃子佩難忘子貢之簪簪男愛女娛並住維摩之  
花鬢莫不願鏡涵兩影絲綰雙心鴛棲不死之床蠶老同功之繭可奈犀難驅病鳩竟爲媒飛龍  
之店無靈弔鳥之山有兆延津劍化遽失雄銚豐水鐘沈但餘雌響以致天錫自名獨活子融不  
許長生慘怛靈輓悵靡燕之夢斷淒涼夜室恨蘭芷之香銷痛甚呼天憂難埋地城崩杞國壺凝  
鵲血之紅水咽湘江羽映浮衣之白願薦身於棺槨何獨忍生誓畢命於絲羅甘將同死然乃尊  
章有命勉存視息於人間姑姆言聊撫髮兒於膝下與其矢殉身之烈則虞母奚依况其有繼  
體之遺則趙孤誰託鴻毛義辨燕翼謀殷于是學嬰兒之事親踵金娃之訓子魚鰈秋日坐織室  
以年年蛾蹙昏心守空房而夜夜此固全貞皓首抱潔終身求仁得仁令儀令式者矣若夫天只  
不諒兒心狂且欲移委志嫠平何害宋朝之猥競求夫也不良子南之禽强委遂爾義無改適  
鮮兩全或割鼻以明心或毀形而矢誓截臂引斧碎且留香斷指援刀存難受辱苟采粉書扉上  
願以屍還皇甫頭紉環中但求死速却寶帶而辭默啜奮翠袖以罵姚萇卒使嶺號清風山名全  
節蘭陵有縣君之賜渤海崇夫人之封洵大節之凜然信白珪之無玷至於斬旁公地之首親報  
夫仇決韓楚言之頭藉伸妾恨者更巾幘之豪舉閨閣之奇稱也已他若成溝渠而注地慘矣娥  
金緣旛竿以上天冤哉青血速答之女墳湧土以瘞親姜詩之妻舍出泉而供母澗旁蕭草因養



姑而始生田畔壺漿必拜母而後飲苟灌則突圍求救龐娟則袖劍搥仇唐山之登堂乳姑緹縈之上書代父凡孝婦孝女之懿行皆人綱人紀之留徽莫不彪炳汗青恢張青白嗚呼百年朝露誰歟豹死留皮千古高風人且駭求遺骨實名相副始稱宇宙完人磨涅親嘗僉表房幃偉烈將茶在手悲生寡鵠之歌刺棘當心痛譜單鳧之弄其有不人欽婦式世仰女宗者哉今日者廟貌崔巍靈旗舄奕丹楹畫桷聿增少室之光梓楣椒漿時醑雌亭之奠拜龍憐之慕景仰堅貞誦鹿佑之文欽遲聖善庶幾白蜺嬰拂同安泰厲之壇翠翟輝煌永奉女嬭之祭

南海沙頭堡議建萬安院募疏

少作

夫神仙登紫府功立三千士子奮青雲念爭片刻謨陳妣后曾詳惠迪之文易贊尼山特著餘慶之理此爲善最樂東平藉以銘心積福有基焦氏於焉垂訓也 南海沙頭堡者舟輿雜沓之場冠帶混并之所固宜贊揚善業鼓舞同人登大願船設無遮會唯是殷情各發急務宜先會卽名以萬安行約舉乎四事今夫因果之說雖近緇黃而報應之奇實同桴鼓感應篇在先儒紅豆之箋陰陽文存學士丹梯之助殆元虞所必讀匪老生之常談苟非喝棒當頭下針見血何能發聾而振聵誰識福善而禍淫石頑點頭說比生公之法水濁濯足悟同孺子之歌林刺心嚴蓮花舌榮此善書之宜講也若夫荆屑秋揚桃弧春贈猶多天扎每兆禳氛當察識於六微待乞靈於百

草然而黃環赤箭非窮巷所能搜金匱青囊非庸醫所能默是宜訪桑田之秘訣普橘井之農春求良藥而艾貯三年聘良醫則臂經九折取之無禁至者如歸藥購韓康不爭二價杏酬董奉徧植千林此醫藥所宜贈也至字紙之拾聖教攸關雨粟徵祥結繩代治蟲鳥分而六書判龍虎躍而八法昭字抵千金文珍片玉近則鴉塗莫惜蠹食堪虞匪太冲之鍊都安排徧於藩溷匪龍門之撰史瑣屑雜乎米鹽行路關心儒林屬目但使功同拾芥事等拾樵陳文靖之碎金求醴陵之破錦將見寶爐焚處蔚爲卿景之光差同禿筆埋時永食文章之報若茶水之施更宜暑月冰山卻冷火井騰炎晨征者騎走如雲夏芸者汗揮成雨清涼一服夢寐三秋鯨汲何妨如飢黔敖之粥龍團乍碾試翻鴻漸之經越士迎流如沾膠醉魏師失道不望梅酸是真消渴而滌煩無愧迎來而送往矣凡茲盛舉各立恒規冀集腋而能成難仔肩而獨任伏願各坊善士當代偉人義重衡嵩財輕糶籓普蘇瓊之實惠擴寇準之深仁無忘解帶之思如有傾囊之助將講堂特創振寶鐸以覺顓愚醫院宏開鍊丹砂而消痼疾不遺隻字見重原功廣惠清茶藉療園令捐贏斥羨顯德標功鐘磬九衢香花萬戶布金錢而襄善業姓名當書若漢碑秉玉斗而注前因福壽定兼失箕範

友論  
館課

夫春鶯出谷伐木求其友聲鳴鶴在陰如蘭合其臭味况復同聲相應同氣相求情性之所孚道



德之所契者也然而翟公廷尉或書羅雀之門劉氏孝標更廣絕交之論抑又何歟豈不以張陳  
隙末蕭朱凶終人仲尼之門徒循汎愛采中郎之說未卽正交致有戴笠乘車亦曾如故翻雲覆  
雨轉鮮有終哉且夫世之交友者吾亦知之矣非有至情之固結也非有大德之交孚也馳騁則  
金張之室排登惟許史之堂窟室酣其鐘聲金谷峻其酒罰王曾之下箸時費萬錢平原之散游  
必過十日是以石崇之富王愷耀其珊瑚寶憲之庭崔駟倒其履屣富交之友則然矣荆卿壯士  
方悲水上之歌豫讓畸人曾寄橋邊之迹劍能飲血匣許藏頭季布之難誰回趙岐之厄可脫則  
有生爲樓護便許託身死傍要離更思穿塚置身游俠之傳豎髮諸侯之庭俠交之友則又然矣  
至若田文門下結客三千毛遂囊中具臣二十摩頂至於放踵拭舌益以膏唇蠟豈慕羶蠅偏附  
熱故國門夜遯非無狗盜之徒關路朝行猶有鷄鳴之客勢交之友則又然矣王孫弱冠之年公  
子綸執之貴金錢拋而作浪車騎盛而成雲加以夜宴朝歌吳姬越艷紛紛投贈憧憧往來不勞  
金石之盟便作煙霞之契原非謝諶入室惟是清風縱有華歆合席懽於舊雨昵交之友則又然  
矣不知門前冷落車馬聲稀世態炎涼英雄氣短愼終如始曠世誰人葛練霜衣卽是彥升之少  
子綈袍雪涕誰爲范叔之故人然則爭富豪夸雄俠倚聲勢逐戲游十載漆膠一朝陌路蓋亦嘗  
聞之矣豈有晏平仲之與交平生善敬魏元同之耐久中道生疑哉而說者謂合志同方信盟白  
水同人于野誓指青松卽半面之相遭亦一心之共託而乃親疎之態起于今昔之富貧厚薄之

情視乎聲名之起落谷風之怨河上之悲固其較著矣然則性情之友亦不足恃乎而說者更謂左思詞賦乃見笑於士衡叔然學徒每欲讐夫聖證學同研席隱判炭冰或爭箋註之奇時歛性理之說若夫程生假蓋束帛遵途阮籍芳樽竹林嘉會求之當世詎有其人此王丹所以論交道之難朱穆所以有傷時之作也然則道德之友又難恃乎不知平勃交歡朝廷倚爲柱石惠莊結契道學亦具風流則夫管生割席而息游劉璉隔裳而示絕或亦其情之未摯而其道之多乖耳不然世有升降疇鮮友生天子至於庶人中國施及蠻貊莫不傾心至好白首締交契誼合于蒼岑清暉接于松石若謂惠而好我膩能汚人則何以管敬仲之貧金分鮑叔鄭崇質之老使代梁公孫嵩有複壁之仁子敬盡指囷之義或且鷄豚拜母長留剉草之歡風雨懷人時贈寄梅之信散聚無所隔生死無所渝答蘇武之書綢繆千里挂徐公之劍神明一心此豈偶然之舉乎抑亦冠然之事也夫世態無常吾心可見戴宏正焚香告祖劉伯倫絕意妄交仲叔含菽之情賈禹彈野之雅爾神余契聆張藉之聲音我懷子清念楊憑之氣節若使形骸靡闔學問相需眷彼新知呼茲古道又豈有枯榮異勢始末殊情遽伯玉之一生未聞寡過陶淵明之三益徒望素心哉嗚呼風塵搔首將伯頻呼文字論心置予何若是則他山攻玉同人斷金必密已而慎人乃中堅而外淡切磋磨琢善到忘形貴賤窮通何知勢分誰能如酒酣薄醉於周瑜我願爲雲遂飛蹤于東常不使道乖德異性渙情離將羞末路之窮獨去高山之頂夫亦庶乎可矣



海防論 丙子應越華課

且自南強北勝封誇百粵之雄虎踞龍蟠海絡五羊之險欲談政治端重邊防思策十全請陳四事夫馬援破敵運指畫而見丸泥蒲何入秦收圖書而得扼塞覽中原之大勢請據荊州策巴蜀之要圖屯兵劍閣夫人城下斷其臂而匈奴降光祿塞中扼其喉而單于敗此固人謀之足恃要皆形勢之昭然粵東門號三重城高百堞東南環海西北負山龍穴虎門實津梁之險隘獅洋馬島爲嶺表之咽喉烏涌魚珠號稱天塹狸頭虎石雄據泥城北門之管鑰森嚴東海之屏維自固於此沿江立寨疊石成台藉萬障之藩籬資千巖之鎖鑰固足以彈壓邊釁亦足以冠冕山河不然鼠一却而一前狐自埋而自揜未能囊底竭志徒從紙上談兵必將如樊城溢而干禁乞降馬容燒而夏侯見藏東關失而魏師以北木門破而張郃再西矣此地勢之宜審一也而或者曰神銃飛懸耀星施而示勁礮車橫陣結雲壘以宣威武備之精亦軍防之要乎不知漢將不飛誰焚二柵叟兵非虎難持一矛李崇竟水之謀能防火棧韓信囊沙之計克制天雷倘使士不知戰將不知兵徒恃燧象千頭火龍百步無益也請精操練自昔戲浮三翼前驅百舸躍彼淪漪乎洲渚習昆明之水戰趣襲如風肄元武之舟師使船若馬范蠡教士習沿流者卒用二千淮南置師諳江路者人惟一百是以東風一面焚盡餘皇北岸五牙獲將俘甲樓船十萬王濬以取益州松桴五千句踐以平吳敵蓋鏡屢磨而更皎銅百鍊以逾精故習慣自然蓄銳必發此操練之宜熟又

一也或者又謂木先立本水必思源不正夷華終成魏蜀蔡善繼之條陳制澳禁絕番艘萬都督之嚴檄採樵防通倭寇竟委窮源之論古人殆可師乎然而政宜法古事貴通今當主少國弱之時值餉絀師糜之日而欲下驅倭之令懲互市之非遠辭西域化此輩爲孝孫順子牛羊盡向南眠奉中華爲震旦摩訶節度無煩北討難矣夫聖人不得已之用豈諱言兵而國家值已蹙之時當注意將際此勢同牛角敵等貂裘儲無七日之糧病求三年之艾則必拔孫吳於閩外求頗牧於禁中錄仲父於刑餘拜淮陰於壇上誠而推轂任以干城酬以爵使樂從感以恩使思奮彼夫上元張宴卽奪崑崙雪夜出師遂平元濟蜀中用崇文之將寇敵見而寒心宋寶興武穆之師金人聞而破膽卽成敗未能逆料事機猝有難圖而霽雲不降男子豈爲義屈匈奴未滅男兒何以家爲實緩急可依人民是賴此將才之宜選又一也然而地利得矣端賴人和將畧儲矣猶防民潰委而去之亦奈何哉且夫燠肌起羸扶風所以稱父母也植桑拔薤郭令所以如父兄也今者民多悍鷙習尙刁蠻懷樽之俗未除探丸之黨尙熾肆虎狼之剽剽警鐸時聞忘疾病之扶持距鄰有門流言煽惑爭爲鬼火鳴狐異教風行幾同河伯娶婦而且迭遭元元之厄未聞濟濟之才旣十室而九空亦十夫而九怨政猛如虎催科餘照水之癰民敝如貂剗肉無醫瘡之計天心悔禍民志易搖一旦白馬嘶聞紅羊劫換風聲雷動赤庶蒼黃見新野之師亦言殺我讀募兵之詔豈曰從君固難言衆可成城且尤恐激而生變矣然百年之弊端賴轉移而一孔之儒難與高論



所賴守牧有惠民之政疆臣嚴貪吏之誅化行則民氣皆純令賢則盜源自息赤囊不警慶粵海之澄清朱草徵祥樂春台之熙皞常則農安稼穡守元公無逸之圖變則民載糗糧作少保義則之饋以此播治以此談兵又何信而不成又何政而不立此人心之宜固又一也要之肉食鄙師未克遠謀狂瀾倒而誰能力挽封居民三萬戶又奚煩防海之圖修沿海五十城何必非安邊之計此匪潛夫之論實爲務本之圖毋以爲老生之常談幸以作邇言之可採將立漢中之銅柱炎州永靖烽煙亦固閩內之金甌兵氣蒸爲日月

### 中西學輕重緩急論

少作

不專乎霸不足以治泰西不近乎王終不足以治中國天下之大用莫如五行五行之大用莫如水火惟西人獨能以制化水火者制化五行總此機器之精益求精其國遂可富可強抑且圖王不成而均可以霸故及今而策救時急務必舉西學鄙夷之其說非必統西學兼籌之不深究其富強之實由機器其說仍非何者釋叟蒸浮任極談之娓娓有斷難責巧婦以無米之炊者謂無實事則亦斷無功機器乃其實事之見端也得資賜特瑣匠耳憤其製槍之機器確不如人兼程向巴黎窮其術普藉以強彼得羅誠賢主矣憤其駛船之機器確不如人隱名向荷蘭窮其術俄因以盛一國之興衰一若君與相都無所措手無貴無賤隨精一藝而皆得轉敗爲功是無論矣夷考西史所書英則自一千六百年至一千七百五十年勻計每年創新機器八種至一千八

百七十七年創造乃至三千二百種他如法則年出九千種美則年出一萬二千種中國之報最以名泰西之報最以實有實心乃有實事凡此又皆其見端顧吾謂彼既以機器致富強其交鄰之入於機而出於機則尤有深焉者從來強兵先必富國西人固混其名曰商戰使人爭羨其美名專門乃可名家西人因混其名曰普通使人愈堅其奢望其立心比禪師之滅蠻經爲尤毒其用意比仲父之作內政爲尤深不此之窮究焉爲問聲光電化等學舉國趨之若鶩者且不止十年有能別出一機器奪彼利權者乎器物有需機器而成者有一不購自外洋者乎設一旦西人審知吾所必需者密爲之防懸爲厲禁無使出關彼遑遑於聲光電化等學者其能徒手以奏功乎然則謂聲光電化等學舉無庸學且無庸兼學乎是又不然大抵論立國之恒規則中學其體西學其用論西學之宗尙則聲光電化等學其枝派機器又其根源無聲光電化等學斯機器之運動不靈無機器以爲省試之資則電光聲化等學抑且虛懸而無所終薄此其輕重緩急之分真有差之毫釐不止謬以千里者然則及今急欲救時法將安出計惟於彼所宗尙者吾亦準此而宗尙之先此奏明約湊資本銀一二百萬除購地基建堂室而外向外洋採買各機器先其價值無多者一二百種儲之公司明示以有能準此機器製造適用能與之齊等者急等差焉而與之獎叙其有泰西所向無能究別創一機器焉以奪彼利權者則更優與之獎叙而且鐵積久必鏽生鏽生斯有用亦終歸無用則又計惟於未及肩承倣造者招人承賃將轉移執事既有以便



失業之貧民該機器亦不至坐耗資財全無出息斯則彼云商戰吾惟務於工戰裕其源彼日本得以立致富強計舍此且別無他法顧公司湊本雖多終歸有限必欲使各機器胥爲我有則又計惟先於我粵特開機器報效一科粵人矜權奇好氣聞有善舉且常恐後人居恆捐之善堂以百計以千計馴至以萬計者且指不勝屈况 上諭皇皇明示以獎叙之厚薄一視機器之大小爲權衡而又報效其名實則該機器仍爲己有有不爭先恐後者乎昔人謂保天下之責匹夫亦得有其權必如是乃得分其責於匹夫匹夫乃得自主其權而實有功於天下舍此不圖欲求全才必得散才欲求真才必得僞才規規焉日拾其餘緒而學步邯鄲於國家富強之術究何補歟雖然機器則既可以富可以強兼可以霸論治則又必取其有近於王何也中國自註疏於漢詞章於唐性理於宋帖括於元明以及我清溯積弱所從來謂無上策禦戎誠無足怪惟是國有以立必立之乎三綱五帝中國則無論爲註疏爲詞章爲性理爲帖括皆無非光昭此三綱五常之理以厚植其基故今雖亞細亞位震近寅歐羅巴位乾近戌當此貞元遞嬗午運方中天地方且以播五行於四時者漸而播之四裔四裔因得以爭相雄長與中國抗衡而但使少知體要者窮究乎人官有能必先物曲有利權輿於霸而仍根柢於王俯視寰球當必有瞠乎其後者前十餘年英之兵總當與余言謂泰西可量惟中國不可量泰西地力已盡人巧已盡其富強止此中國能究於地力加之意焉於人巧加之意焉其富強當不止此誠哉是言是真能統舉全球而深知

其要領者所望應運而興者知圖書生尅日與造化流通從此先五行而次五事幸得屆五千年  
天中景運且將合帝族而大其靈承庶幾中興之基其肇諸此乎

### 夏日泛舟大通寺徧歷花地園林序

館課

若夫一舟溶溶菱塘柳陌之中幾曲彎環淺水疎篷而外長松夾岸盡作濤聲煙靄半空不見日  
色其間有大通寺焉南漢時達摩禪師駐錫於此後主更賜名寶光是則人海菩提夙修淨慧佛  
門煙雨近住游蹤良以地僻多幽人間好事或招涼而選樹或買夏而入林隨意往還此事邂逅  
時則殘暑乍退清溪起涼荷葉之陰鴨搖蒲帆之影魚唼煙波雙棹張志和本是釣徒書畫一船  
米元章乃爲顛客或擊祖生之機時吹世昌之簫於是弭棹看徐沿隄行緩好風一片夕陽殘棧  
經白板之橋橫紅門之寺山僧道我是坡仙蒲澗之遊谿虎笑人有靖節東林之趣吁目遐睎放  
歌徐行水流則前溪後溪花香則十里五里亦有萸沂竹里蕭條輞水之莊懊室涼亭隱約平泉  
之築橋纔通步門正對江衣香散而胡蝶陪履聲清而野禽避何將軍之山館杜少陵帶詩而來  
顧辟疆之名園王獻之肩輿而至樓臺處處長留二月之春詩酒年年還近衆香之國桃源偶出  
便得來船蓮社重盟何妨斗酒然而鬢絲禪帽即皆香火之因緣江月山風詎僅水天之閑話况  
復平田近接美人之金粉飄零破廩遙傳故國之山河髣髴卽謂仙山佛屋亦慣興亡眞館靈祠



未經寥落而荒壇煙黑古井泉清話陳迹以何年極娛游於暇日則亦情來興往感慨係之矣嗟  
嗟蒲團花雨清涼之世界非遙野水閑鷗漁釣之生涯何託而芰荷聲裡自放孤舟松檜陰中歸  
來斜日名園誰記且待洛陽李薦之書高會長留願學曲水王融之序

恭祝 勅授修職郎候選訓導歲貢生 晉封文林郎翰林院庶吉士松村年

伯大人暨 勅封孺人 德配張孺人七秩開一雙壽榮慶序

少作

夫聽鶴聲之羣和每想青田觀鳳翽之齊飛輒懷丹穴本原有自誕毓斯奇伊英物之猶然矧達  
人之秀出者乎是以謝家五鳳播譽西州王氏十龍馳名北魏縝維綜絳並成經緯之才玳瓊珪  
琪咸作璠璣之器金昆玉友肯構克家既外式乎義方必內資乎聖善微是父必無是子理固宜  
然非此母不生此兒說尤可信已然而箕裘克紹屢鍾鸞鵲之祥未必叢佩相莊長守鴛鴦之社  
求其稚龍雛鳳早蜚華國之聲弋雁鳴雞尙保同藏之慶若我年伯松村先生暨年伯母張孺人  
者殆史冊所希聞抑薦紳之嘉話乎維年伯懸鈴協夢浮磬鍾祥紹先德於干城振家聲於跨竈  
翩翩綺歲王敬仁作論之年卓卓名言李鄴侯賦棊之語洩雞磔鼠共驚文采於奇童起鳳騰蛟  
益壯詞華於學士爰從弱歲卽冠童軍再列前茅仍膺廩粟於是下帷息影閉戶覃思發陰符十

篋之書足文史三冬之用張睢陽之強記讀三徧而不忘蔡中郎之博聞送五車而悉誦白虎德  
論遙承東觀之經師雕龍文心直接西京之詞客爾乃沈博絕麗旁推交通下逮莊騷上規姚姒  
驅韓潮而超蘇海八家遜其恢奇薰宋艷而擷班香六代慙其淵懿朝爲百賦皇甫湜見而猶驚  
字值一縑裴令公求而未許既爭雄於文陣仍騁異於詩壇擊鉢可催投囊常滿王右丞之澹遠  
都作畫圖杜工部之沈雄實成詩史加以六書稽古八法宜今方寸千言經丈一字羞爲禁體非  
復縮蛇繁蚪之觀偶作草書都成虎臥龍跳之勢於是不脛而走無翼而飛問字停車析疑載酒  
表忠碑出誦來句驪之使臣長慶集成購自雞林之賈客縑素四集翰墨靡遑成五朶之雲筆畫  
十支之日戶外屢滿樽中酒盈故雖屢躋棘闌終遲桂窟明經中第昌谷得消微之問策預傳東  
坡竟遺方叔旁人惜其蹭蹬而年伯固樂我蕭閒也至於束修自好庸行無虧道樂顏原孝希梅  
閔當子含潔羞之日正高堂解組之年春酒兩卮綵衣雙舞仰橋俯梓見嘉樹之交柯慈竹孝梅  
繞養堂而接蔭及夫蓼莪誦輟松柏種成徒抱楹書時思篋扇里爲罷社恐觸孝思盜不入鄉爭  
欽順德仍推心於錫類爰講學而盍簪士願升堂人思學海經談虎觀咸摧五鹿之豪席接龍門  
交萃八廚之秀猶復方貞白壁比直朱絲甌任生塵刺常減字至或于旗下問前席諏咨情見乎  
詞義形於色千間廣廈剏開校士之庭一旅鄉兵悉靖伏戎之野喜鹿鳴於貢士費裕賓興憐鵠  
寡於貞鰥典求旌表又未嘗不慷慨自任勞瘁不辭蓋王彥方之仁聲李士謙之陰德語其節行



無以過焉故能作善降祥緣仁得壽長飲酈泉之鞠預裁王氏之槐而年伯母張孺人尤昭內助之賢克秉柔嘉之德盧家淑媛舊傳祥女之名楊氏賢姬兼有嚴師之範泉曾汲鯉風佐承歡藥可丸熊仍襄教子是以嘉祥悉集瑞應先徵特生商嶺之艾用兆燕山之桂哲嗣長君 新捷

南宮之選蕊榜書名旋邀

北闕之恩木天聯步次君

茂才

孝廉暨

茂才等或擷香

於桂樹或拔萃於茅茹文通武達齊高庠序之聲介弟難兄並裕廟廊之器而年伯暨年伯母齊眉尙慶華髮未添孟德曜之倡隨同高行義葛稚川之夫婦並是神仙偕老偕臧多男多壽翩翩科第方看人踏金鼇濟濟文孫更喜座環銀鹿是雖木公金母遊璇極以齊年織女黃姑對銀潢而並壽合天上神仙之豔福爲世間耆耄之純釐靡得備此休嘉無以方其盛美者矣維六月上澣之吉爲雙壽榮慶之辰歲甲初周古稀先兆當孝里梅開之日用祝九如似天仙果設之辰預逢七夕秦樓弄玉來貽偕老之方吳嶺文簫更進雙仙之訣子星羣耀遠過南極老人鄉月雙圓更勝西河仙姬 與嗣君金蘭幸託玉筍欣聯夙欽北斗之名喜上南山之頌所願雖窠人老見袁家四世三公尤期 鳳闕恩覃比蕭氏一門十相謹序

約崔璞荃少作

碧天寥廓庭樹報秋息車杜門逸興斯逸擲書而意已倦舐筆而腸欲枯秋亦笑人柳堪愁我對

花神而欲語盼石友以不來足音窅然使人目斷夫三秋之思采蕭爲勞一枝之贈撫極欲愴相思不見咫尺千里悠悠白雲能無惘然且杜陵茆屋難免秋風之悲康節藜榻自號安樂之窩茶香四壁藥燂半爐明月瞰牕吟昏未浹好風拂幕園書欲翻一燈熒然輓轡心轉嚶聲求友誰則懷我好音燕語迎人子其不我遐棄西風瑟瑟良夜迢迢認楊柳之是門愼母曰靖節閒情王誼好事也

致崔璞存書

少作

判蘊以來寒暑載換願言之隱有懷如何閣下高懷淵冲雅度夷曠枕經薛史袁伯業之嗜書規箴矩模鄭次都之勵行文藝器識是曰能兼攸往咸宜甚善甚善桂抵家以後人事罕接卽欲潛志墳籍肆力駢儷而賦性既懶慚公叔之專精釋卷輒忘類昭明之泛涉學殖荒落殊無以對知己耳猶憶曩時同術合志相與檢校圖籍商榷古今陳思定敬禮之文昌黎改玉川之句推懷投欸耦俱無猜茅齋兩楹近在咫尺榴木一樹高于檐櫺耳熱酒酣左顧右盼謂衛霍未足侶蕭曹不足侔抵掌以談狂態百出自以爲友朋常事耳由今而思光景如昔而已有離索之感也鉅川師已到館仍課舊程子雲元亭可問奇字扶風絳帳庶傳一經夙願則然未知能有造否耳



與龍石蓀書

丙子少作

賜復瑤章備承明訓窮繹雅意兼寓宏規竊感莊氏方舟之言用申孔門言志之義桂少而失學長未窮經問枵腹以何知識慚杖杜歎盲心之如許解誤蹲鴟而且沾沾自喜侈誦王楊盧駱之文翬翬竭思復效鮑謝陶韋之體有昌黎之愛博無季子之揣摩又況文園善病筆硯久蕪叔夜多疎懶慢成癖懷鉛憚其苦枕函之秘空懸剖璞乏其能學海之濶皆竭未克董帷努力難期江管生花學殖之荒有自來矣故思粹掌勸學折節求師揚雄元亭可問奇字馬融絳帳庶傳一經雖芒屨以無辭實祛衣而恐後亦以木從繩而得正玉追琢以成章也而其厭置帖括者則以志貴自立人各有能使嗜左燃劉峻之薪吾知其文不逮強博覽抽法盧之秘竊恐其智弗如東野則致病詩寒仲宣亦貽譏體弱質有所限曩哲皆同使必昌黎清真斥樊南之繁縟徐鉉敏速笑張來之遲鈍又何以解於登山探玉涉海探珠之說哉矧夫文藝器識當重所先歐九不嫌於劉放文章早稱宿老萊公見規於張詠樓臺亦號相公正何必效時世之妝借終南之徑始足稱孺雅弋科名乎嗟夫祖宗之遺風敢墜父兄之祈望方殷固難以置芳澤而弗陳黜鉛華而勿御倘他山石得資攻錯則敲門輒亦易陶鎔

君來函語

竊附朱陸之異同益徵歐梅之至契臨箋愧惕待命

悚惶

與劉

書丁亥

承詢

遺著傳河汾之學首重薛收輯紫陽之書厥惟黃幹緬懷風義遠邁昔賢先生以經世之才承纂述之雅商量舊學備劉峻之三長博采方聞成公曾之四部以李公元度先正事畧譌奪既甚舛悟滋多廣厥咫聞爲之補纂問襄陽之耆舊賴有成書攷汝南之先賢猶存別傳先君精研掌故圓矩邳張嘗曰此編若成其爲李燾長編弇洲史料乎遠徵其書欲任梨棗之役先生欣然許之寒暑遞嬗人事變遷遙盼寄書尙虛宿諾嗚呼湘江綿渺空懷齋鏡之情風樹淒零徒抱鑿楹之痛追惟曩昔愴悵如何

復康長素箋

丁亥

承教惠白梅一株縞衣僊子翩然來思林下美人溫其如玉汲功德之水澆此相思燒迷迭之香圓成好事幾生修到問種樹以忘年十索吟成共巡檐而一笑重帷落粉彷彿輕肌曉鏡臨風徘徊儷影願明月之常滿恨東風之來遲意而玉女名虛不作荒臺之夢湘娥瑟冷空招夜月之魂轉益多愁不敢言謝

上龍舜臣舅舅書

少作

睽澗光輝倏更歲歲簫緬懷雅度怒如輶飢獻歲開春遙想君子福履攸宜歡喜無量桂久蟠家



街徒擁楹書墜雨欲零秋蒂云邈揚子之草廬自寂翟公之門雀可羅未嘗不念門祚而歎歎仰風雲而咤叱歲月易得懷安是誠爲貧而仕殆其時乎昔馬卿高才甘爲納賁之郎元亮逸士尙隱折腰之吏况如桂者又何擇焉然而閒居有賦宴歲長貧惟守夏侯之經本乏江陵之橘身非彩鳳旣無翼以雙飛靈異牽牛亦乏錢之百萬欲圖祿仕其道末由夫負薪行吟賃舂韜迹此有識之所共歎知舊之所累歎也伏維執事義薄雲霄財輕巢繹嘘沫千里廣廈萬間拯人于溝壑之中推我于九天之上無德不報有懷如何敬承數語居佇聆明誨

### (補遺)

#### 先曾祖左桓光祿公家傳

公諱經國字調禮號左桓雲達公之子也少倜儻四五歲時日隨父雲達公上學問字而父食貧授徒童蒙常數十人日不暇給以是督課亦不甚嚴及七歲父沒哀毀如成人人始異之方是時無立錫之地無僦石之儲母子相依零丁孤苦吾鄉距省三十里而遙且夕可往反公日則出省負販夜則母子織作機聲鐙影恆達旦稍長傭工於外尺累寸積漸獲贏餘年二十三凌夫人來歸夫人織紵治家於內公服賈治產於外營什一權子母豐實益聞嘉慶十三年遂承充洋商初雍乾間海宇承平外夷屢請互市朝廷念其誠欵允之朝議復思所以控制之法廼設立商總

而輸餉項而總其貨之出入使不得它往違者罰不受罰者絕其互市其時事屬創行百貨充牣多以是起家者嘉慶末疆臣防約廢懈海禁漸弛夷人亦狡然思逞於是洋務日紛商務日壞而故事欠餉不可告退亦不可拚擋支撐家累因之頓積而公陽陽如平常未嘗絲毫見顏面也公爲人寬平長厚未嘗多讀書而倫紀克敦自原天性母莫夫人患乳癰怒則發公承迎色笑朝夕惟謹每自省歸必躬詣華佗廟祈藥療治父沒時家貧葬事艱卒莫夫人常以爲恨公仰體親志延師相地改葬如禮從弟某無故毆公仆地公徐起一笑寘之後弟愧悔公亦不藏怒宿怨以養以娉勛至成人南海通儒梁教授序鏞嘗語人曰孝乎惟孝友于兄弟公庶無愧其名流推計如此生平少貧壯富自奉一如貧時凡禽魚竹石珍玩諸物世人所趨若鶩者視之洵如而常用財解萬金無吝容吾族自前明宅處黃埔歲祀垂四百讀書砥行者不乏人顧未有以科第起家者祭產亦薄祀事多闕公常以爲媿嘉慶二十四年族屬倡修祖祠需金數萬僉有難色公慨出萬金族母嚴淑人亦助萬金事遂舉公復與族老籌畫增寅營業春秋得無闕於祀北亭四世祖墓在縣南大夫岡重修時誤傷穴暈不利公適自以爲功出貨貲修建仍其舊趾如青島家言宗姓賴安當洋行盛時族鄰待舉火者百數十家病者藥之急者周之朋友稱貸未嘗不予曰交友倫也通財義也胡以銖累夫權爲及期當償黠者或詭以饗告公遂不復問以此人多以是嘗試公知之亦不問也常語諸子曰人能受虧亦是好處汝曹志之性喜先正格言暇則披覽以爲勝於



尋常說部常誦人欺不是辱人怕不是福兩言勸人亦自勵終身以未克力學爲歉以故隆於課  
子訓道嚴飭賓禮善士使與磨礪灌漑厥後諸子掇科登仕皆矯厲有立人謂義方之教致然公  
以歷次捐輸繇州同知議叙鹽課提舉司提舉疊加至道銜繇道銜加三級請封 誥授通奉  
大夫捐輸武陟大工奉 旨給帑建坊如例年七十有七道光十七年卒以子貴累膺封贈光緒  
十年以孫肇煌官江甯布政使加三級覃恩晉贈光祿大夫

### 原任順天府府尹候補四品京堂梁公家傳

公諱同新原名綸機鄉榜後更今名字應辰矩亭其號左垣公季子也公姿識英特韶壯負遠到  
器年十八補郡庠生明年中嘉慶二十三年戊寅 恩科舉人道光七年援例授內閣中書十應  
會試道光十六年丙申廼成進士改翰林院庶吉士散館授編修歷充 國史館協修纂修總纂  
官二十四年充甲寅會科 殿試彌封官二十六年督湖南學政校閱試卷漏下數十刻不少休  
積勤至舊疾爲發所取士如湘鄉羅忠節公澤南王壯武公鑫新寧劉督部嶽昭劉武愼公長佑  
劉忠誠公坤一茶陵譚文勤公鍾麟桂陽陳巡撫士朮湘潭黎文肅公培敬皆能樹節概建勲業  
爲一代偉人楚人謂公能以文相士稱道至今三十年補山東道監察御史三月充會試外籐監  
試官時權相穆章阿當國久中外少骨梗吏吏治率貪黷弛壞盜賊蠭起兩廣尤甚公卹焉憂之

謂亂機已萌夫今不治必成滋蔓遂上疏曰竊惟近日盜匪之多自直隸山東河南及江浙兩湖等省劫案迭出幾於無處不然而最多且甚者莫如兩粵粵東自英夷滋事後土匪益無忌憚陸路則時劫當舖致廣屬當商退餉歇業者十居八九水路則常劫渡船致東莞石龍民間自設巡船防護當舖在人煙稠密之中渡船則每載百數十人尙且被劫其餘荒村孤客愈不可問雖督臣徐廣縉亦屢飭勦捕而劫案日多者良由一人耳目不能周知而州縣則規避處分諱盜爲竊營弁則因循怠玩不力巡防及事報到官書差多索使費竟有被劫而不願報者甚或借盜銷案以致正盜遠颺故非破除情面嚴定賞罰以治州縣營弁則劫案不可止又有事類於劫而慘甚於劫者一曰擄人勒贖一曰分界打單擄人勒贖之風始於順德新會交界之間今漸及番禺東莞每擄一人囚諸密室逼令致書於家度貧富而取價萬千百金不等若不肯贖而報官卽遭殺害旣贖亦懼其復擄不敢報官州縣營弁以其不報卽知之亦置不問近海圍田匪徒按田勒索謂之打單否則搶奪禾稼傷伐果木或擄人而去此廣屬情形也至廉欽之靈山與粵西之橫州等處盜匪更爲猖獗其賊首最著名者爲張家祥稱公道大王所管地界四百里擾亂年餘今聞官已說降然猶陰行打單此外則李自葵鍾亞勝兩股爲大黨羽數千逼近靈山縣城官無如何遂令李自葵族長勸之投誠自葵亦效張家祥陽奉陰違之計自回壇墟逼脅各鄉良民入會人社山被圍十餘日卒索銀千兩又有胡奇堯一股起於靈山百勞墟范晚一股起於欽州彭城司



蘇甯三起於九龍墟或各處打單或擄人勒贖上年七月那鄉土匪三千餘人爲首者三一靈山波連村黃青培二粵西宣化村埠潘德佳三那陽村顏品瑤在奇零墟拒傷官兵九十月迭劫粵西之永康羅陽復於龍頭墟得馬數十匹其勢益張十一月占據太平墟焚燬西鄉司署上自古鎮下至夾棍四十村皆被勒索或銀數百兩或錢數百千其蟠龍墟荼毒更甚粵西橫州沿江千餘里盜匪分據五處每貨船過威逼將錢銀數目吐實令出買路錢無者令賣貨交足粵東人自西省販運油豆者皆相戒不敢行所劫掠衣物竟在戎墟開設估衣店遠近墟場勒令每店寄居匪黨數人石嘴墟則全被占據似此猖獗無狀若不大加懲創恐其貲財日積徒黨日多蔓草難圖必致釀成巨禍與其治之於事後勞師糜餉驟難成功不若治之於事先捕要擒渠尙易爲力今粵東洋盜已平湖南賊匪亦滅正當及時速圖治理請 旨飭令兩省督撫合力勦捕毋畏事之難辦毋慮費之難籌毋粉飾彌縫毋空言塞責務將著名賊首悉數殲擒渠魁已誅餘黨自散但賊首消息最靈布置尤宜慎密股賊所在不一官或不能徧防當先令各鄉自練團勇因其遠近大小或以數鄉爲一團或合數十鄉爲一團每有賊警彼此救援官兵進勦各團勇亦可合力協捕則兵能衛民民亦能助兵而盜賊可以肅清矣臣昔家居偶聞劫案今則習爲常然失今不治積而日多恃衆橫行益難撲滅此臣愚謂廣東西今日之患首在盜賊者也時英吉利求入廣東省城不得駕火輪船赴上海投書意存恫喝公揣量夷情謂疆吏不畏事則不生事又上疏曰

臣聞有英夷火輪船赴上海投書傳說爲廣東入城一事果爾則必以前督臣耆英許約於先今督臣徐廣縉失信於後爲詞查此事上年經徐廣縉與該國夷酋往返面商據情入奏仰蒙 宣宗成皇帝俯順民情特詔優獎維時夷酋震懾不敢抗違卽在香港出示禁止諸夷不准入城而移覆文書亦云以後不必再辦此事矣今忽越境來訴聞託言奉國命而來卽使奉命亦當在粵投書其所以不在粵者爲督臣徐廣縉熟悉彼情難於挾制因陰行其反間之術以窺探朝廷我

皇上天亶聰明彼雖譎詐多端難逃

洞鑒且事事上承

先志下協民情自必撫馭得宜無

虞過當然臣愚竊有慮者恐老成持重之臣鑒於前事謂夷情叵測桀驁難馴若拒其所求必致滋生事端有壞撫夷大局臣學識拘迂何知遠大願生長海濱習知夷務參以近日所聞所見而可決其必無事者其故有三請爲我 皇上敬陳之一者論之以理而知其無可藉口也今者之來果以失信爲詞則是彼旣以理言卽可以理喻使知耆英之許其入城而必約以兩年者爲民情洵洵不可強壓非故緩期以相欺該夷酋之肯爲姑待者亦明知衆怒之難犯也迨徐廣縉接任亦以民情激則生變於彼無益故勸其不必入城原非背約倘謂官可制民不知官可禁民爲非不能威迫以強民之所不欲故凡無厭之要索當據理以開導之無事曲從也二者揆之以情而知其不敢輕動也凡外夷之強弱視乎貿易之盛衰國用出於斯民生賴於斯而貿易之盛則全恃乎能通中國中國地廣人稠財物豐盛凡入口諸貨無物不可銷而出口之茶葉湖絲夷民



得利甚深其國收稅亦甚重是外夷實賴中國爲生財之地中國可藉貿易寓馭夷之權也夷人萬里航海血本所關若動干戈卽須停市淹延歲月賠累實多故非萬不得已不欲動兵今則上海浙江廈門皆准通商又得香港以爲駐留之地所願已盈此外所求皆節外生枝非其要旨不過欲顯其求無不得誇耀諸夷若據理不從彼自知難而退安肯以無關緊要之故致貿易不通乎故知其情必不輕動也三者度之以勢而知其不能妄爲也夫謀事必知彼知此乃能悉中機宜聞英夷所居三島不過若中國一行省耳物產無多所恃以致富強者全在占據埠頭收其貨稅稅多則兵餉足偶遇不足則借資於民而與之息是貨稅之外又恃有富商大賈以濟其窮近年貨物滯銷該國夷商倒敗至數千萬則民財已非昔比又聞其與佛郎機構兵所借民欸數十年始能清完又與米利堅構和賠餉三萬萬年前入擾內地所費亦復不貲元氣已虧國勢日蹙所幸照常貿易得以強自支持耳若見事勢難行彼亦乘機思轉蓋其心未嘗不懼我天朝赫然震怒下令閉關此時欲興兵則禍由自作師出無名欲相持則有碍通商勢難久待所爭者小所失者大故知其勢必不妄爲也又况寡衆不敵主客異形樓船巨礮所利在水捨舟而陸非其所長故前所擾者皆沿海通商之地粵中三元里以鄉民尙勝夷兵乘其隙而攻其短是在應變之善爲用耳總之夷人之情不知止足愈畏事則愈生事能處事乃能無事若沿海疆臣果能內修法度以全國體毋失之過柔外示懷柔以顯皇仁毋失之過剛剛柔適中則不戰而勝海

宇可以久安矣又以天主教生奸萌啟亂源請嚴其禁疏曰竊臣前見兩江督臣陸建瀛奏請崇正學以黜邪教一摺奉 旨飭令督撫學臣實力奉行所謂經正民興斯無邪慝正本清源之道也惟是教人以善尤當禁民爲非今所謂邪慝乃天主教非他邪教可比今日之天主教又非昔日之天主教可比查歷來邪教其始不過聚衆歛錢然爲所愚者咸自知其不法治之尙易爲功若天主教既爲法所不禁而夷人復誘之以利聞入彼教者人月給二十元或十餘元愚民以爲既可得財又不犯禁遂因而漁色漁利無惡不爲地方官以其天主教也畏而不敢辦是彼教行而法不行矣法既不能制復有所藉以爲援治之殊屬不易故曰非他邪教可比也前法夷請准天主教流行內地諸臣議事不詳以彼信奉天主不過欲與釋道兩教並行且其教自明季至今未聞生事故議如所請不知今昔夷情迥異其特爲此請者欲得吾民以爲用也聞習其教者餌以丸藥遂專心信從雖死不悔是一人習教則一家變爲漢奸百人習教則百家變爲漢奸而至千萬輾轉相傳何可勝數往者沿海肆擾亦欲占據疆城潛圖要地特兵力不多難以分守人心不服難以久居衣服言語不同難以深入若得此數十萬習教之漢奸同心協力爲羽翼爲爪牙則無事不可爲無地不可至若有戰爭則受鋒鏑而被殺戮者皆吾民也而彼則有厚利而無大害故曰非昔天主教可比也知習教必爲漢奸則不可不禁知夷人欲用漢奸愈不得不禁在陸建瀛意謂前既弛之今復禁之未免予以口實不如自扶正學自治吾民然思患必當豫防亦明



刑乃可弼教如良醫用藥無病培其本有病治其標今天主教之爲病顯然而但培其本標病不去元氣亦傷臣豈不知弛而復禁之難然今日畏其生事他日卒至多事況以中國法治中國民非禁彼教之不行第禁民之不得入教耳但禁之當寬旣往而締將來其前已入教者設法約束咸使自新後有犯者議律嚴懲無使倖免相應請 旨飭下廷臣妥議嚴禁曉諭中外免致蔓延庶奸萌永息而風俗還淳矣方是時公洞知天下事習苟且奸民思亂戎敵生心故一入諫垣勇言天下事是年六月廣西洪秀全以天主教惑人遂倡亂桂平金田邗明年咸豐改元不兩載遂破湖湘據金陵蹂躪及十六省四年廣東紅巾賊起亦殘破數十州縣六年英吉利挾奸氓寇廣州總督葉相名琛畏事懞懞歛手待寇明年遂糾合佛蘭西破廣州轉擾天津逼京師流禍到今七八年間內外交訌公皆先事灼見其萌而不獲振捄時論痛惜之咸豐元年巡視北城民有叔姪爭產者委婉諭以大義相愧悔罷訟案無留牘情無瞻徇人不敢以私干之其秋轉掌山東道御史二年京察一等擢禮科給事中充峽甘鄉試副考官得高岫等六十二人多知名士其冬補通政司參議三年廣西賊由河南竄擾天津都城戒嚴朝官多告歸者或以勸公公怫然曰此豈人臣致官時耶督辦團防鈎稽嚴密奸宄銷迹四年擢內閣侍讀學士五年以 康慈皇太后喪奏言 皇太后撫養 聖躬十有餘年 皇上守慈母如母之文特尊爲 皇太后臣考儀禮喪服三年章云慈母如母傳曰妾之無子者妾子之無母者父命妾曰女以爲子命子曰女以爲母

若是則生養之終其身死則喪之三年此謂大夫以下天子諸侯則不服庶母也小功章君子子爲庶母慈己者傳曰君子子者貴人之子也爲庶母何以小功也以慈己加也若曾子問所云君使教子之慈母則無服魯昭公練冠以燕居君子謂爲非禮觀此則知大夫以下之庶子爲慈母服三年天子諸侯無服禮經甚明昨恭讀 上諭命恭理喪儀王大臣詳稽舊典悉心核議臣恐王大臣等謂名與實符既隆 太后之稱當遵 太后之禮然所謂禮者無不及情亦無過平情情之中當裁之以義伏乞 皇上勅下廷臣詳加參酌上愜 聖懷下符公論庶可以示來茲而光萬世又片奏曰宋史楊淑妃傳載仁宗在乳褓章獻太后使妃護視凡起居飲食必與之俱擁佑扶持恩意勤備章獻太后遺告尊爲皇太后以其所居宮曰保慶皇太后景祐三年薨仁宗思其保護之恩命禮官擬加服小功此事與今日頗相類其加服僅小功則當時典禮可知矣謹摘錄附片以備裁擇疏入如所議行六年以南糧歉收請由上海招商徠洋米以裕京倉足民食七年擢通政司副使十一月晉順天府尹公爲治務持大體不苛亦不縱固安令濫斃生員案久不決公親鞠得實立按罪輦轂肅然都中自行用大錢日形壅滯民以爲不便公疏請變通錢法改鑄小錢以蘇民困事雖不行識者韙其議八年八月監臨順天鄉試提調官蔣達以闈中供給闕少斥責屬吏公寬大弗苛小節意與之左達負氣出闈揭公袒護 詔褫達職公亦降四品京堂候補十年正月十二日卒於京邸年六十有一公性聰穎好覃思酷嗜墳籍經史而外旁及術



數星命相墓之屬靡不研究議論英邁常屈其座人自言官歷府尹前後疏十餘上皆係天下大計不爲空談闊論亦不毛舉細故世號知體要生平無世俗嗜好晚歲益務澹泊研窮心性宗周子主靜之說昕夕潛心體行著有碧山草堂詩文集二卷圖書奧義四卷歸安姚承輿所撰陰陽指正多采其說及寢疾至性不亂時子肇煌官侍講侍疾京邸顧囑之曰居家以孝友爲本居官以清正爲先方今時事孔棘汝能力圖報稱吾無憾矣遂卒其年歸櫬葬廣州城北白雲山御書閣了哥壠同縣陳京卿禮表其墓公原階迪奉大夫後以子肇煌官布政使頭品頂戴 覃恩晉贈光祿大夫

誥授光祿大夫頭品頂戴護理兩江總督江甯布政使梁府君行狀

府君諱肇煌字振侯別字檀浦廣東番禺縣黃埔鄉人曾祖諱昭緒妣莫氏祖諱經國候選知府道銜妣凌氏考諱同新道光丙申翰林順天府府尹妣凌氏以府君貴三世皆贈光祿大夫妣一品夫人府君少穎悟讀書勤敏先王父京兆公督課至嚴每命一題必數易稿乃得當故府君爲文不苟番禺歲試不下數千人府君輒冠其曹年二十五補邑弟子員咸豐辛亥舉於鄉壬子計偕以外王父龍太常蘭移公任分校迴避未與試時先王父服官京師府君所以蒸蒸色養者甚至癸丑成進士改翰林院庶吉士丙辰散館授編修己未 恩科充順天鄉試同考官 大考翰

詹 欽取二等第六名授侍講庚申正月先王父見背哀毀骨立十月扶櫬歸里卜葬如禮同治  
癸亥服闋回京五月補侍讀充 日講起居注官教習庶吉士 國史館纂修官功臣館纂修官  
協辦院事本衙門撰文甲子充湖北正考官得余雅祥等六十二人多知名士其尤者洪給練良  
品張侍讀楷敖太守名震或以文章風節稱或以刻苦勵行著鄂人稱道至今乙丑 簡放雲南  
亂政滇省久被兵厥途畏前後督撫學臣以規避獲譴者凡六人府君拜 命輒行道出四川滇  
學益甚川督駱文忠公飭有司備行館借廉俸欲稍緩其行府君不可乃奏言雲南學臣梁肇煌  
抱塞蹇之志冒險之官臣仰體 朝廷優待儒臣謹派兵三百從衛論者咸謂文忠知大臣體而  
高君亦以此深荷 上知逾年間關抵迤東適岑襄勤公毓英以道員率師進勦東路來見抵掌  
府論若平生歡時勞制府崇光督滇與府君雅故會言官劾岑跋扈 廷寄交勞公查辦 旨意  
嚴厲勞公馳急足寓書府君詢岑行事府君復書曰岑毓英忠勇果毅可大用滇亂之平端賴此  
人勞公據以入告岑以此漸被 朝廷倚任卒爲西南邊徼重臣既抵任振興文教其賊氛未靖  
者爲疏請調考試卷必親閱率夜以繼日累月不疲頒文式四條曰重倫紀曰通經史曰習詞章  
曰慎行檢門下士謁見環集聽訓誨綢綢如老儒厥或些窳改業則割俸資之李吉士熙文李編  
修肇南孫農部清士皆以成學滇人感其意有泣者丙寅補左右春坊庶子丁卯補翰林院侍講  
侍讀學士戊辰補詹事府詹事庚午調補順天府府尹辛未二月抵任除苛解燒一期於活國活



民吏無忍欺壬申水災疏請傾倉賑卹全活無算癸酉以先王母凌太夫人病乞歸省五月抵家凌太夫人色喜霍然病已甲戌瑞文莊公麟張中丞兆棟聘主越華書院講席拔尤選俊風尚以正乙亥丙子高才生襲襲焉擢巍科去者無慮百數十人新會江門釣臺明儒陳白沙先生遺跡也鄉人趙氏糾衆拆毀勢張甚府君與搢紳扶義詆斥趙氏奪氣謀以賄啗府君曰汝不聞雷聲乎峻却之釣臺積今屹然番邑初釋菜者例納司鐸官印卷金條紳措辦力多未逮府君倡議代輸經費籌款置田勒石橫舍士林大歡光緒乙亥凌太夫人卽世附棺附身必誠必信如前喪時己卯五月回京再補府尹八月充順天文武鄉試監臨官列字圍校射大臣稽查右翼覺羅學先是先王父曾履厥職時府君讀書署內不二十年府君兩莅厥職門人孫農部清士繪圖紀盛江南名宿汪孝廉士鐸復爲文徵詩海內名流題詠幾遍尋補福建布政使轉調江甯布政使於時庚辰三月也甫下車嚴庫欸絕苞苴一切委署章程州縣交代靡不舉審轉京控各案毋濫毋縱辛巳覆訊三牌樓命案悉心研鞫獄以平反得 旨交部從優議敘江南朱家山河工自雍乾嘉道間迭經督臣商榘疏瀉均坐工大費鉅莫得要領比左文襄公宗棠建節來南復倡議之府君實總其成初發難羣情洶洶也府君力排衆論親履工次督同各員弁輔志弊謀鹽沒兩載功用告成左文襄奏書金陵建設以來前後興修水利凡十四案皆乏成績今觀明效實貽皖吳百數十年之樂利厥功以梁藩司爲最應請從優獎敘奉 旨交部議行又建復石城橋九龍橋添

儲義倉穀米增置惜陰書院膏伙養老院育嬰堂經費事無洪纖罔弗集爲政務寬大矢實心所至興革利弊必審夫人情向背事勢原委而後斷然行之故未嘗厲威爲聲名而吏民愛戴左文襄奏保有才大心細辦事實心之語壬午二月文襄巡閱軍政奏請護理兩江總督奉 旨知道欽此八月代辦江南武鄉試主試監臨夙弊一空癸未解足西征協餉十成奉 旨賞加頭品頂戴復以辦理賑務出力從優議敘甲申閏五月左文襄應 詔薦賢以府君與曾侍郎紀澤魏布政光燾德布政馨同列樸章謂堪膺督撫重任如有過失臣願一同受罰疏上奉 旨存記泊法夷肆擾左文襄視師於閩疏請辦理福建後路糧臺兼辦雲南軍裝協餉當是時天下驟苦兵革民無堅志海疆尤甚府君紆徐料量外固海防內籌軍帑閩吳倚之屹若長城左文襄謂僚屬曰吾此行微梁布政事且勿濟蓋生平相知之眞推挹之誠以文襄爲最云丙戌五月陳請入覲蒙召見二次奉 旨留京候簡府君向患抽筋症七月復發頗劇乞假歸抵里後優游家術時與二三朋舊爲文酒之會舊疾間發而氣體尙健詎十一月十四日晨起痰上逆亟進醫藥罔効竟棄不孝等長逝矣天乎痛哉距生於道光七年八月二十三日享年六十府君性孝友家庭之間藹藹然無忤色交友誠篤與香山何制府璟順德黎光祿兆棠南海郭孝廉延禧爲卅角交以道義相勗勵後何黎二公皆貴顯而郭公獨貧周卹之終其身生平博雅好古曾訪求吳學士璣文集於同年薛農部時雨家爲校刊以行於世府君外柔而內剛服官四十年不肯有所依附壬午某



大吏道經金陵公謙之餘謂德糧儲壽曰外間紛言某以他途進此二百年所未有者政變如此國是其殆然予與君皆不及見矣德公曰君抗直無擇言爲世所忌雖文襄屢薦章一再言之上前卒未竟其大用蓋時爲之也相與歎歔者移晷平居諭慶桂等曰汝曹毋忘國恩毋隕先業慶桂不肖無以仰副先訓述之有餘恫也而今已矣卽欲再承提命不可復得矣天乎痛哉先妣龍夫人仁孝慈惠行實具家傳中先府君十四年歿側室五人子十一人長慶驄郡庠生次慶桂丙子科舉人內閣侍讀學部參議上行走慶衍慶楹慶壽殤次慶鏘甲午科舉人次慶暄邑庠生內部郎中卒次慶滌次慶祿次慶榜殤次慶變女十一人長適南海庠生崔牲次適香山何制府璟之子熙章次適順德庠生周若曇次適順德羅文恪公惇衍之孫豫澂次適順德簡士晉次適同邑許中丞應鑠之子庠生江蘇知縣炳璈次適高要馮中丞之孫庠生紹志次適南海廖進士鳳章之從子珠材餘早卒孫四人廣照庠生法部總辦秋審處典獄司主事舉敍司員外郎廣燾庠生早卒廣材廣濂幼曾孫三人着有讀書撮要二卷讀史擇錄四卷思誠齋文集二卷慶桂不自樹立惟湮歿先德是懼謹撫平生言行萬一伏惟當世賢有文者錫之銘誄以傳之家乘以備國史採擇其敢忘百世之賜不孝慶桂泣述

### 星藩公家傳

公諱綸樞字拱宸號星藩左垣公次子也少讀書深自刻苦夜誦恒徹旦不寢年二十補邑弟子

員尋竊於庠英聲雋二疊屢躡棘闈乃於道光七年援例候選訓導溯自嘉慶庚午迄道光丁酉凡十四年踏省闈卒不售公自是無復進取矣先是左垣公承充天寶行洋商嘉慶末商務日壞貿易多折閱而左垣公復年老多病公日夜籌代父勞道光七年遂稟請換名接辦八年捐輸河南工費銀九萬五千兩由訓導議叙道員職銜二十年行務益困以欠餉參革明年完餉開復又明年在本省捐輸海疆經費銀二萬兩奉 旨議叙加鹽運使銜始乾隆間設立洋商例以家業殷實者爲之而輸其餉洋貨入口總歸洋商販買不得他越當是時承充者凡十三行洋人奉令惟謹其見行商皆旁立弗敢坐也自海禁弛洋人驕洋務愈變愈壞衆商因之坐困公自接辦後勉力支持十餘年來心血俱耗後西洋英吉利之亂以諸商向不便已縱火焚燒行地禁遏撲滅而家業遂日蹙矣十三行散戎馬生郊此不惟一家隆耗系之實不勝世變之感者也咸豐元年粵西賊起公奉大府檄設局勸捐軍餉三年復辦團練四年春邑珠邨匪徒械鬥公集學商議以械鬥不已變亂將起當先事防患爰與邑令下鄉勸諭旋即解散不逾月紅賊即東莞順德新會南海佛山四處屯聚而番禺新造一帶尤猖獗是時賊勢蔓延沙灣則何博份鍾邨則李阿繼蠕涌則林洸隆新造則陳顯良其黨佈散邨落以萬數又有賊艘千餘往來河面會城東道爲之不通公乃與何宮贊若瑤請於制府開局城西籌餉募勇於是沙灣菱塘兩司紳士稍稍出集五年正月遂率團勇隨同官軍進勦遣勇直入大籬圍之市頭扼其中樞諸鄉義民羣起應和鏖戰數日



夜新造陳頭鱗涌諸賊遂平公復與諸紳定議移局南邨安集善良搜捕餘匪改局爲貴南書院以總沙菱兩司之事是役也籌款至四十餘萬皆借自殷富議事後償還事定稟請大府撥欸清釐不允議畝捐又不允遂至貸欸無着其後擬獎叙公與何宮贊皆辭弗受也六年西洋英吉利竊廣州總督葉相名琛斂手待寇七年十月英吉利遂糾合佛蘭西破廣州虜葉相屯兵觀晉山人心惶駭官紳士庶紛紛走避在省者惟鎮粵將軍與巡撫柏公貴而已公奉柏巡撫札與伍方伯崇曜俞觀察文詔易觀察蘭連日進城會洋人於觀音山反覆辨論常至夜分乃出闔城得無大騷擾時城空無人洋兵伺守者手槍腰刀猙而立瞠而視或以無職守而蹈危地非笑之弗卹也嗣洋人分據衙署屯兵貢院者屢年公復多方勸諭之始遷去貢院得以重建其奮身赴義多此類同治元年總督勞公崇光履任以公熟諳洋務多所諮詢因舉歷年辦理情形入告奉 旨賞加二品銜二年以粵東用兵餉缺署督晏公端書巡撫黃公贊湯奉瀛勸輸軍餉三年總督毛公鴻賓署撫郭公嵩燾又以咸豐五年克復新造及歷年辦理城西沙菱兩局勞績保奏 旨賞花翎蓋自咸豐改元而後內訌外侮籌餉籌防時事多故而公宅處城西老成諳練巋然負魯靈光之望省中每有大事大府必造廬請謁質問方畧公亦舉夫時局利弊民生病苦知無不言言無不中以故屢爲大府倚畀推薦如此八年已已科試重遊泮水曾孫廣淞亦進縣庠是年復舉元孫公年二十生子四十生孫六十生曾孫至是八十生元孫皆二十年一代邑紳連名以五代

同堂親見七代呈請題奏奉 旨賞給七葉衍祥匾額及銀緞諸物遐邇榮之公爲人寬平淡泊無時世嗜好暇則讀書經史外旁及相墓雜術而孝友尤出天性母凌夫人以喪長子得病公侍湯藥百端譬慰衣不解帶者累月及歿哀毀踰禮父左垣公曉以大義乃節哀順變道光甲申乙酉間術者謂左垣公運當厄公憂之在家爲壇朔望鷄初鳴向天默禱願減己壽以續親算如是者二年卒獲無恙比丁艱喪葬盡禮竝仿古人廬墓之義築旋螺山莊於冢旁時往居焉左垣公少貧壯富而凌夫人早歿每以不逮事爲憾忌日薦珍饈則愀然曰吾母生前豈有此乎淚涔涔隨俎上先世墳塋散在城鄉清明祭掃必躬親年八十餘猶扶掖登山縷述先德指點界址語刺刺不休訓子弟以篤實爲本勤樸爲基皆身率之不徒言教也同治十三年踵唐賢白香山洛中故事與南海朱良材漢軍樊封等結九老會築九老寄廬於城西華林寺歲時讌會唱酬爲樂鶴髮鳩杖里閭宏觀如是者三載光緒三年六月二十五日微疾卒年八十有八總公生平弱冠登聲譽序十四踏省闈而弗售論者僉以文章憎命不登一科爲公惜當咸豐朝髮逆之亂楚中諸鉅公皆以諸生禦賊洊保至督撫大吏而吾廣紅賊之亂南海大瀝九十六鄉紳士麥佩金等練鄉兵禦賊屏蔽會城得不破後又四出勦賊功最多僅以舉人保舉知縣公與何宮贊籌勦新造諸賊東路以靖功亞之當時且無獎叙論者又以葉相忌才不授一官爲公悼然公塞於人通於天塞於壯豫於老年近百齡銜膺二品泮水重遊同堂五代會開九老舉人生得一而難者備集



於一身且兒孫弟姪科名仕宦聯翩鵬起公皆身見之歿後沙菱二司鄉人以公有功於鄉奉其主祀於資南書院知天之位實原自有在君子樂天固無尤焉兄業軒公諱綸勳字康樂敏悟好學應童子試屢列前茅年二十遽夭士論惜之

### 少亭公家傳

公諱肇晉字振康號少亭矩亭公三子也少負志氣觀書卓犖年二十二補諸生時仲兄方伯公留任雲南學政公從之二年滇中回醜壘延文事之外兼習軍務以軍功保舉縣丞不就歸應同治九年庚午鄉試中式十三年甲戌成進士授禮部主事以措資假歸光緒三年邑侯聘主禺山書院講席課時文外兼以古學體切生徒人知嚮學八年壬午偶病遽卒年僅三十有九公爲人聰達伉直敢任事光緒元年新會陳廣文殿蘭以白沙釣臺事爲邑令羈押闔郡不平連名奏記大府公復自致書粵撫張公兆棟陳以大義辭無忌諱事遂獲解三年石角圍潰水患及省垣官民力籌堵築大吏請公與順德李侍郎文田及堂育善堂諸董事督其役履勘隄圍勸諭捐輸况瘁不辭績用以成其德乞雨祈晴籌餉緝盜禁採蠔墮豁免洋米船鈔并陳書大吏爲鄉邦請命其慷慨任事蓋天性也讀書不株守帖括既冠後問業邑通儒陳京卿澧得其指授撰述皆有軌度爲文樞胸臆直書其蘊洋洋灑灑數千言當應剡坡書院文課屢膺首列由是文譽大起韻語好作議論同年生吳川李孝廉文泰所撰海山書屋詩話亟稱之謂其七古生氣勃勃

酷似東坡近體亦復秀健上所書有自撰年譜一卷希古堂詩文集四卷藏於家

潘任卿觀察家傳

代元燧表弟作

先君諱衍馨號任卿性穎出讀書勤敏幼承先士父榮祿公庭訓與先叔父澤亭侍讀公昕夕攻苦每自塾歸先大母梁太夫人督課之燈下晤語機相答和善屬文每稿出輒驚其儕輩鄉先達皆以大器期之祖士父庶堂公見背塾於公游學外出家無担石儲先君偕先叔父竭力權拄以筆耕自給某歲以府案第一人補邑弟子員辛酉舉於鄉先叔父適登拔萃科副登乙榜乙丑成進士入翰林戊辰散館授編修先叔父亦於是年獲館選兄弟以學問相切劘一如少學時既而以憂歸哀禮備至

聘主韓山書院講席課生徒以實學力屏浮靡之習潮人士至今

誦之服闋回京供職乙亥科充順天鄉試同考官丙子科簡放湖南副主考悉心搜閱夜漏數十刻輒未息故所拔名績學士乙卯京察一等記名以道府用纂修

穆宗毅皇帝本紀庚戌

特旨以道員用晉二品銜賞一品封典壬午京察記名如前八月簡擢陝西潼商道請訓日

德宗勅以整頓關稅事事認真先君懷遠

訓命維謹時先兄寅生聞命下以先君病後未復

元長塗雨雪恐不支乘間稟商進止先叔父方典黔試撤關後兼程北上冀緩其行先君以渥承寵遇亟圖報稱寄諭先兄言康健就道途次積勞舊病復發迫抵省城喘增劇請假調理先繼慈高夫人封臂和藥以進病勢稍殺惟以積年委頓元氣大傷三易醫皆罔效三月病終於潼關宦



次春秋四十有五先君待人誠信恥奔競馭下無疾言遽色自奉儉約顧喜施與里中有不舉火者輒隨多寡贈之嘗謂功名富貴豈足繫情第稍可自存得分餘祿置義田爲贍族計余願斯足與先叔父友愛備至入共几席出共車裘畛域不分四十年如一日先君歿後先叔父自傷梵獨號曰踽盒其其怡怡之誼可想見矣先君於書無所不讀凡漢之訓詁宋之道學歷朝政治之得失諸家詩古文詞之宗派皆隸類籤識有所得輒手錄之尤留心時局識見宏遠官翰林時海禁大開交涉日繁世變日亟嘗與先叔父言舊制取士應事變通宜於此時開藝學特科以預儲人才後先叔父官國子監司業遂本此意具疏陳請皆先君志也元耀少孤於先君學術多未窺見僅從遺稿及手諭中得其一二先君之言曰用功有一定之課程每日要有片時習靜澂思定慮此心無牽罣功候既久神智大開百病都卻又言精神之用勿太過心計之用勿太工範身處世於禮字恕字喫緊斯可矣又言修德爲善積福養身惜神葆福拓其心胸和其天倪是所以擴福之境鬯福之機汝曹其勉旃今先君棄養三十餘年矣元耀不肖未能闡揚萬一每誦遺訓惴惴然以不克負荷爲懼昔祭統有言先人無美而稱之是誣也有善而不知不明也知而不傳不仁也不揣櫛杌謹述先君政績行誼以告當世君子亦庶免不仁不明之誚而已其有憐先君之未竟其才而憐之少孤無教者乎吮墨濡毫聲與淚俱

### 致張漢三

睽澗譚讌載易寒暑音問致簡自知疏節塵務填委家累煎迫稽康性懶師丹善忘長此因循用  
滋謗咎以君知愛當能諒之去夏香島風潮澎湃執事過返鄉國值游林淑曾子之室薪木未毀  
鄭公之鄉屋廬無恙誦仲長樂志之論著陽固演蹟之賦閒居潘岳頻擁圖書高臥袁安惟餐風  
雪春秋佳日庭花初開招邀故人酣嬉近局蘭蕙芬馥霏子春之清談風月華妍門江淹之速藻  
煙霞自痼鋒鏑不聞顧望風流伊其翹想桂避地濠鏡已歷歲時自憐任葛之窮聊作皋廡之隱  
澹庵近在咫尺微尙時相過從各以事牽相繼歸里青春作伴雅慕杜陵天涯淪落惟憐白傅異  
鄉簪盞雨駁雲乖獨夜攝衣瓊思瑤怨嘆人事之多幻感天時之靡常入月以來氣候頻變積陰  
疇疇濕雲滃滃霖雨壓簷狂風撼戶深夜氣冽輒擁重衾方穀欲尋吳綿尙御慘澹之積鬱爲癘  
災仰視蒼穹惟深嘆喟宿雨初霽停雲欲流琴尊昔娛亂離今恨青暉天末懷戀如何一水可通  
省港有候  
復交通說片帆飛渡會言近止不其樂乎衍椒曉颿想常相見未及札致希爲道意敬承動定萬福

秋日感懷十首

記六

平林漠漠炊煙大地山河落日圓遠道雲連烽火合成樓風重角聲懸憂時敢著潛夫論閱世  
惟看秋水篇湖海元龍豪氣在摩挲弓劍尙丁年  
空山落木鳥聲繁蕭散當秋正斷魂萬里關河仍白袷一天風雨又黃昏磨驢吟得新詩句羅雀  
題將舊板門淒絕長堤數行柳先秋搖落總難論



窮愁身世感偏孤，竟欲論交到狗屠。中夜猛醒樵鹿夢，不才深愧牧豬奴。雲鵬尙倦凌風翮，候雁初銜避瘴蘆。松竹舊盟知冷落，不堪重作歲寒圖。

登臨獨上越王臺，木脫風寒大漠開。翹陸豺狼爭道出，哀鳴鴻雁抱秋來。眼中時局棋千劫，身外浮名酒一杯。苦憶平生少游語，跼齋風物亦悠哉。

寥落風煙近市寰，誰從大澤薤榛菅。危時路橫龍蛇窟，炎徼雲羆虎豹關。劉峻有才（一作秉筆尙能）修信史，禹王無鼎（一作范金真欲）鑄神姦。羅浮舊日梅花約，爭奈無錢買寸山。

風塵知己漫相將，欲買胡琴笑澁囊。幸有班書堪作米，愧無白醉可名堂。閒居蕭槭悲秋賦，寶劍光芒俠客鄉。腸斷桓伊三弄笛，大江風雨夜深望。

### 爲長素題畫冊二首

扶桑初旭映瞳矓，照水胭脂色樣工。獨自始婢泥污外，等閒開落月明中。廬山舊社名留白，太華新霜粉墜紅。世事榮枯祇如此，不須飄墜怨秋風。

右荷

金戈翠葆不凡材，十載冰霜手自栽。斑籜有痕曾啖雨，玉芽抽筍不驚雷。黃州樓冷伏龍嘯，二仲徑荒幽鳥來。歷盡嚴寒青不改，營巢鸛雀莫相猜。

右竹

### 步宋松存滬上感懷詩原韻

楚騷憂怨賦章華，胡越居然是一家。悽愴伊川誰被髮，髡髽京洛願生牙。九州瀛海成爭鹿，大地

山河噪暮鴉莫聽江南斷腸曲淒涼賀老撥琵琶

再步松存原韻

鞭絲帽影憶京華海上雲萍未是家秋雨梧桐同白社曉風楊柳唱紅牙玉車騷鬢涼嘶馬金谷樓臺夜集鴉風景未須生百感月明江上聽琵琶

洛陽旅舍題壁

北風獵獵送輪蹄愁絕城頭烏夜啼殘月微明天欲曙行人爭唱白銅鞮  
待漏金門幾歲華上方珍賜出天家記從西掖來歸早曾贈妝臺芍藥花  
土飯塵羹事事非淚痕和墨染征衣春明舊日繁華夢都付東風作絮飛  
隴樹燕雲夢不迷連天煙水壓城低郵亭幸有三間屋落粉遺脂是雪泥  
烏啼枝頭塵鏡開故園芳訊憶寒梅愁紅恨紫都無奈自拔金釵劃玉台  
一日雲山一日程山到處有逢迎今朝又見東流水（葉爲邑外東流水子路問津處）落日寒煙弔古情

荊棘銅駝問却灰通津橋畔莽蒿萊東南聞道猶烽火故里空懷洗氏才  
楊柳亭亭綰離別陌頭春色惹相思封侯自是男兒事說與高樓少婦知

九月五日星巢大兄約遊安期生祠先成水調歌頭詞一闕桂亦得詩數章聊當屬和並呈同游庾生菴孫兩丈季裴四兄



傳聞飛錫是真仙，問訊安期幾歲年。  
願向壺中成小隱，淮南鷄犬亦翛然。  
同作山中汗漫遊，蕭蕭落木不禁秋。  
頻年辜負黃花約，都付江南萬種愁。  
萬峰高插白雲巔，百級攀登欲到天。  
笑向山中說鴻漸，杖頭親數買茶錢。  
獨立西風最上頭，萬松陰裏漱寒流。  
狂歌被酒向誰是，太息人間滿八騶。  
時局如棋事可知，乾坤蒼莽不勝悲。  
伯鸞未是因人熱，詎爲牢愁賦五噫。  
滄海歸來一釣身，禪堂花雨憶前身。  
春清談薄酒最宜，我露葉風條休惹人。  
（偶談年前舊事，星巢遊興勃然，又約爲珠江之飲，辭不就。）

歸路迴環樹數行，斷橋流水稻花香。  
行人別有悲秋感，如此江山付夕陽。

### 荊紫關道中寄柳谿簡始叔葆翼張西安

柳色參差拂曉來，攀條贈遠意徘徊。  
青山笑我若爲別，芳草撩人一舉杯。  
萬里歸雲趨粵嶠，三邊羌笛起秦臺。  
江湖敢擬持竿去，極目神州首重迴。

### 送某藩伯移節甘肅

韶書幾度下鑾坡，臥轍歡騰臺榭歌。  
簇道香花縈袞舄，（公去日遮道攀留者萬人）殘年雨雪度關河。  
採風五嶺懷輒少，落木三邊故壘多。  
北望中原控秦隴，澄清清攬轡意如何。  
燕山洱海憶前塵，慷慨談兵共此身。  
兩世論交風義在，十年話舊鬢華新。  
碧幢遙指潼關月，元石

長留庾嶺春醉後贈君雙玉劍相期無負胆輪囷

### 紅豆

紅豆花前有所思夕陽無語立多時何人擲笛東風裏吹送間愁上鬢絲

### 題張樵野侍郎運甓齋話別圖卽送出使之行

鸞輪滾滾蹴波濤曉日光芒擁彩旄萬里河源通析木八荒風物醉葡萄安西都護金城策橫海  
將軍玉帳韜宣布 朝廷威德意使君才畧振羌豪

海外今聞大九州天風吹過鳳麟洲摩空奇氣吞溟渤仗節高標動女牛五字河梁廣屬國百蠻  
風土記荒陬（公有出使日記）弓衣織得新圖畫槎使應傳博望侯

### 閱花橋小立口占

無邊霜意著蘆花小立溪橋送落霞菰米香炊漁子艇枳籬低護野農家夕陽人影驚寒鷺流水  
秋光點暮鴉正遇西風感飄泊三年萍梗尙天涯

### 秋日登三君祠天海澄清閣感賦

乾坤莽莽豁雙眸身世蒼茫一倚樓謫宦幾人淪嶺嶠斯文終古鎮炎州山川形勢今非昔草木  
凋零夏易秋撫劍微吟復長嘯天風吹遍海南頭  
獨立西風百尺台天容海色鏡中開孤城夕照沈笳管隔座山光入酒杯落落風塵肝胆在堂堂



歲月鬢毛摧秦關漢苑都秋草日暮荒岡首重迴

敬步

琴表兄先生和蓮裳觀察登蘇氏碧江樓詩韻並呈蓮裳觀察

艸樓高矗碧陰連秋意迷離紫翠巔鏡社有人同白醉酒缸如

黃庭堅詩誠堪塔阿巽賈紅樓酒缸蘇氏伯仲爲二公快塔

十年舊約京華夢一笑西風水竹緣最是大羅天上客文章輝映五雲鮮

乙未出都留別之作

三月聯牀漸離市十年解帶趙陀城艱難頻共鑄金石肺腑均連如弟兄才命相憎垂欲老乾坤  
迴互莽無成江南花落嶺南雨愁對飛雲海上生

閔行差次卽事

監稅蕭然作隱淪沙舡門對浦江濱冷煙薄霧起秋水細雨斜風訪故人  
正憶修門舊夢長鄰花隱隱過東牆近來海水添江水最是傷心一葦航

太平洋舟中柬沈曹二君舊金山世界日報記者梁君及美洲諸同好詩

並序

予客美洲倏忽逾歲興學事畢束裝歸國梁君君可曹君競生沈君子英以太平洋圖贈行  
君可繫之以詩子英填詞而競生爲之序以壯行色藉抒遠懷文通之管一雙邱遲之錦十  
尺曉風殘月高唱屯田社燕秋鴻儷聲玉局詞鋒騰發別緒雲騫予展卷興懷望洋增歎誦

渭北暮雲之句重與論文續天涯芳草之詞媿無妍唱海天壯闊情思瑩洞凡屬素心同茲  
繾綣寄呈君可競生子英三君並東美洲諸同好留別詩成再當郵遞尙希諸君子和之也  
鬱鬱風雲盤大陸峨峨文物振華京輜車遍歷東西路（由羅省技入華頓盛出紐約芝嘉高硯崙舍路轉域  
多利雲高華復返三藩市凡成立學堂八所）記取僑民愛國情

富強今日論歐美道學千秋重孔顏欲振人文興祖國夢魂長繞落機山

黃石園中景物幽攸嘉湖上足遨遊清名祇媿謎斯水（君可贈詩有清名長比金門月句愧不敢當美國謎  
斯斯干江爲環球第一云）知是中朝第幾流（東坡詩單于若問君家世莫道中朝第一流）

楊柳郵亭鎖日垂（所至各處皆承各紳商歡迎歡送）江湖憔悴鬢如絲金山夜雨春潮長（三藩市又名金  
門華僑呼之爲金山）又是玲瓏唱別時

石田詞藻自生光子建文壇亦擅場獄獄吾宗老詩史風流遙泝六瑩堂

去年春暮同爲客滄海波濤話苦辛今日分飛伯勞燕天涯萬里一歸人（去春來美與許觀察荅西令  
子述生曹君繩祖昆仲黃君伯勤仲幾嚴君道成麥君韻樵暨予同事朱君鼎卿何君伯述曹君競生程君吉葆何君寶衡硯  
行凡十四人家弟慶鑾亦由菴麻士來會客中相聚談讌歡洽今荅西羈於官守諸君則以肄業大學均皆留美而伯述赴同  
崙鼎卿赴紐約寶衡留芝嘉高家弟又留學羅省停雲天末良增懷戀）

落日憑欄悵遠天思鄉懷舊意纏綿太平洋上如輪月曾照當年詩酒筵



代友贈

算來話別未多時別後初嫌相見遲  
記否挑燈鐙下坐此情只有雨聲知  
料是新愁兩地同夢魂猶繞桂堂東  
無情豈但吳淞水剪斷煙波信不通  
家在蓬山第幾村青苔暗鎖白雲門  
何時明月紗窗夜倒盡鵝兒酒一樽  
淚痕還比墨痕濃鄭重魚書拆又封  
莫道秋風消息杳涉江還爲采芙蓉

題舊院尋春圖二絕

踏青此地易魂消迴首荒庭往跡遙  
賸有無情堤畔柳春來依舊門纖腰  
六朝金粉已成煙尙說當年貯管絃  
隔院一聲長笛杳夕陽紅到酒旗邊  
沒痕殘月遠峰低芳草淒淒故徑迷  
花外秋千空弄影滿林紅雨亂鶯啼

半塘采菱詞

少作

十里斜陽照眼紅半塘塘畔柳絲風  
看來幾箇如花女笑逐菱花入鏡中  
嬌紅嬌綠總葱纖著手棱棱刺欲黏  
底事相黏郎不識偎教新樣比鞋尖  
依依兩角恰相支雙手摸來轉自思  
同伴漫輕來翠謔各家心事各家知  
浮萍一度兩邊開隨着鴛鴦去不回  
阿姊携籃剛上市隔溪聞喚荔枝來

祝陸鳳石相國七十雙壽

當代推耆碩奇徵應瑞圖八埏開壽域卅載盛文儒瑞藹河山滿祥光日月扶東南誰伯仲勲德  
稱金朱稠疊花團 誥斑爛綵作襦蒼生紛頌禱元考足訐謨少日騰聲早凌雲得氣殊麗詞機  
出錦健筆架雕瑚簫譜雙竿竹琴材百尺梧驪珠探別浦駿足箭修途謙想金堆粟名鏡聽照芙  
蓬山風力順杏苑露華腴幟樹驚人赤菴成出手虛無雙題佛塔第一領仙都鰲背前宵夢龍頭  
幾輩呼 御香來鄭獬 講幄問純夫履曳星辰動麻宣雨露濡花磚迎曉步蓮炬徹昏衢 大  
用留今日高懷作世模酬 恩由感激受 寵轉踟躕澄志冰壺在掄才玉尺紆東方曾志數南  
郭笑吹竽元禮門牆峻靈光輩行孤尙書尊冢宰端揆位中樞分照人如玉誰遺事記珠談心風  
月久鍊骨雪霜俱時望齊山斗 天恩暨海隅 飛龍逢首歲賚弼慶宴區蒲艾迎佳氣鸞皇贊  
瑞符齊眉賡漢樂鼓腹和吳歛下走談瀛倦長筵捧袂趨崧生逢盛會華祝走環涂竊願今周召  
爲邦軼夏虞相門新奏議醫國古都俞晝永松常健神清鶴不羶瓊林重宴日泚筆正愉愉

那琴軒相國六十壽

昭代重光日涼秋七月天嘉時逢露湛上相應星躔壽寓寰中拓能名海外傳列邦資鎮撫八表  
待陶甄有客南中至論交累葉聯曾觀滄海粟自分野池蓮舊夢依山斗茲游滯薊燕感深慙朽  
質詞拙貢長筵通德門圍戟承家坐列幃將軍山水畫才子孝廉船顧視無凡近恩榮與接連丹  
心昭日月隻手轉坤乾郎署初從事夷情漸狻焉連宵韜劍氣萬卒靡戎旃對奕輸疑手鳴琴誤



拂絃勞絲治未易短袖舞徒然才爲諸公惜憂貽兩聖煎轡槍清大地震霖望高田不有匡時傑  
伊誰重國權風平江浩浩霧豁月娟娟壯歲膺殊遇農官曰有年持籌參遂幄汎楫得名川司馬  
宣仁識非熊尙父畋由來名世者應結主知先元氣調金鏡神謨贊玉璫鼎湖紛雨泣繡句望風  
旋自昔矜文物輿情薄義氈交鄰聞至道醫國在歡痊鷹睨環相伺狼從謂我僂山河無遠近規  
矩有方圓取譬人求劍庸工自刻剋衷由持理折對取誦詩專鬼任盈車載關惟一尺鍵廻瀾標  
砥柱志穀失空琴間缺封圻守人推外相賢帝心簡在禹令尹次於邛管鑰門雄北旌幘馬引前  
風行隨月兔音好變霜鸚道力吹羣萬禪心化大千龍津雙海闕驥野九方歎賤子羈孤舊秦關  
慶賞延駒光拋歲序漁隱閱風煙好善雖從衆談瀛未是仙不圖崇獎飾聊報以詩篇竊願公難  
老蒼生道始全窮居甘擊壤佐命翊惟荃階舞新千羽塵清舊甲鋌十年期必達一德仰彌堅興  
念神先王銘勳手不胼皸頌黃髮載擬沛言泉

### 祝譚篆卿母七十壽

婺星燭燭秋月明雲和曲奏蘭陔笙摛陵家世鮑謝手鞠膺捧觴千萬壽鹿車昔謁玉京塵珠海  
歸來又幾春眼看青紫諸兒貴尙憶篝燈剪髻辰

### 壽節庵六十

禺山靈輿區瀨氣挹海若川岳嶽鍾毓賢傑代有作惟君間世生天才特恢卓少歲騁詞翰旋入

石渠閣平生報 國心詎敢自菲薄欲化萬丈虹長天掃寥廓上疏擊權貴洪聲振蒙弱柳下直  
去官胸懷了無忤季世正道衰嶺學就淪落欲以正抹弊如以水濟涸君歸擁皋比後生仰先覺  
六經盤根柢百家辨純駁立論闢奇袤行誼務端恪菊坡竊私淑玉山探秘鑰移風扇兩湖源流  
遠疏淪百事具模楷羣情奉築襲天子睠求舊一麾展猷畧清却武昌魚澤霈襄陽郭搗撫蕭  
何法氓庶免毒蠹喁喁與誦聲惟德馨配錚餘事作詩人留題付黃鶴興義挾肝腑清氣蕩圻堦  
瓣香在蘇黃時體薄盧駱獨立鸞鳳姿紛紛蝸與鶯忽忽四十年事往都如昨人情疊遷變世事  
幾悲愕神州竟陸沉坤輿紛糾錯忠孝無滄桑元精耿河嶽 橋陵撫弓劍傷心翠華邈孤臣揮  
涕淚麥魚裹饘橐河山忘遠近風雪自咀嚼松柏歲寒姿輪囷峙丘壑寫作種樹圖星眸光湛灼  
帝曰汝忠貞可入侍 經幄稽首再拜言臣敢負所學說命稽懋典古義攷河毫紫陽今賜緋  
司馬夙居洛懋學膺殊榮交遊共忭躍憶昔與君交肝胆欣有託道義相勗勵文字就商榷顧我  
素蠹強辭氣露鋒鏑蘭茝道則同好惡情則各不屑因人熱不受俗情縛吾自存吾真何論世謠  
詠會短苦別長南北又離索燕雲望淒黯嶺海沸衆濁澄清誰攬轡觀復兆窮剝流光驚逝波執  
熱當盟濯君今正六十壯心爵鵬鷖重六值嘉辰壽君君固却聊復寄新詩陳言去糟粕惟祝致  
太平百年共杯酌

壽關樹三七十初度



金風吹綠瀛洲草南極星芒射蓬島瓊枝玉樹繞庭除開遍秋花秋月好座中一老地行仙小謫人間七十年賣餅錢供慈母饌刈薪貧有逸妻賢一朝名上登科記十載官居青瑣地捧檄終酬毛義心馴雉猶傳魯恭治世事滄桑紛變易掛冠遠謝軒裳客眼前青紫付兒曹海外優游寄泉石綠水青山好結廬梧雲遙望故鄉居三生杜牧春猶艷百尺元龍氣未除仙郎舊是金華彥明時珥筆承光殿歸來上壽獻瓊卮千樹桃花簇芳讌笙歌如沸酒如槽仙鶴蹁跹下九皋夜闌更奏龜茲樂仰視清天弦月高

市中購得竹扇畫松一株骨幹蒼勁偶爾感觸因題一截于上

卅年盤爵空山裏誰識<sup>癡癡</sup>不世姿大地蒼茫一長嘯瀟瀟風雨歲寒時

節庵三度返里道出香江談讌僅及半日今又匆匆行矣贈此誌別

萬里霜侵髻淒淒感歲華客愁今夜雨鄉夢故園花風節堪千古文章自一家知君抱忠憤飄泊尙天涯

徂歲一携手今朝又紀行風雲徒變滅心事劇分明卅載輕離別家貧戀弟兄同盟有松柏未敢負平生

爲毅夫題妙香畫蘭

九畹秋深玉露滋湘雲搖影上花枝綠窓涼月簾垂地自潑雙螺寫楚辭

諸老風流異代聞  
摩杪松巒尙氤氲

陳其年紫雲硯銘摩杪久之松巒氤氲又捧硯圖國初名流題詠幾遍

迦陵詞史今誰是  
又擘蠻箋賦

紫雲  
年年蘅夢繞江岑  
瑤怨瓊思兩不禁  
老去風懷似元九  
一花一葉一沈吟

### 顏君恆甫以邱仲遲邱園稚集圖囑題漫成一截

江上琴樽三月社  
畫中雲樹十年人

菽園題有重尋畫裏十年人之句

披圖無限滄桑感  
脂墨蒼涼黯不春

### 春游

策杖郊原步履來  
招邀朋盍餞春杯  
東風也解詩人意  
猶有庭花未盡開  
經旬霖雨淨無塵  
楊柳絲絲颺遠春  
乳燕啼鶯爭惱客  
閒愁都付詠花人  
遙聞天海風濤曲  
又作滄桑此度經  
離亂聲中聊一醉  
斷腸芳草斷腸亭  
連天霧氣濛濛重  
千尺清絲攪不禁  
風電挾威損桃李  
落花啼雨怨春深  
道是碧桃花謝後  
亞枝紅影夕陽遲  
近來頗似嵇康懶  
祇作春游不作詩  
棠梨落盡不開門  
竹筍新成綠蔭繁  
門外爭流奔霆急  
此心安處卽桃源  
彈指韶光百五過  
遊踪寂寞負春多  
水楊成幄翠相護  
詩境豁然開澹沲  
隔林犬吠向行人  
春草煙湖碧色勻  
一曲闌干一灣水  
微風猶颺麴波塵

### 寫懷



舊家池館雨痕迷正盼陰晴氣候齊楊柳無風輕作舞閒心不作絮沾泥

### 雪娘詞

銀箭冷冷漏滴壺舞衣緯縹戲氍毹雪兒自是重台壁不數江南十斛珠  
卷畫樓臺縹緲間縞衣仙子下人寰紅牙按遍凌波曲婉然新豐謝阿蠻  
瀟湘舊恨記迷離妙本新翻付曲師安得臨川湯茗倚絃爲譜葬花詞

萬木峰頭百草黃問關負骨劇悲涼猶餘一掬家山淚留與詞人弔夕陽

雪娘有葬花夕陽紅淚諸劇

侗公識曲論南北譚李新聲獨擅場尤羨樵山芝老采自誇蘇小是同鄉

康長素有侗公識曲蘇小同鄉之句

夜雨歌臺酒乍醒曾從海外識娉婷十年幾閱興亡事撥盡燒槽不忍聽

在港始觀雪娘演劇

### 敬題梁節庵種松圖卷

大地山河黯不春故宮陳迹話酸辛寢園風斷朝烏淚弓劍哀餘逐鹿墮種樹有書猶舊臘哭陵

無路泣遺民所南朋輩凋零半悽愴當年汐社人

聞道高瑤抗議中孤臣涕淚雪山風草埋金雁寒無色棘蔓銅駝恨未窮論古心悲虞舜典攀髯  
夢逐鼎湖弓貞松百尺多君種歲暮凌寒此意同

### 南陽宮保爲畫廬山觀瀑圖敬題四截句于上

十年不見匡廬面今日披圖一惘然珍重商山采芝老墨花飛處著雲煙  
舊遊我亦滄桑客三笑亭邊可再來聞道叢巖經浩劫尙餘飛瀑未成灰  
萬丈奔騰竟若何山中豈亦有風波銀輪終古無停息翻使谿流變幻多  
歇馬臺荒碧蘚侵香爐峯渺暮雲深此中可有桃源路欲問漁人何處尋

玉臣以詩見贈賦答一首並寄星巢京師

飛鴻跨江來蕭蕭風日晏瑤華一披展清詞愜幽玩離情感今昔世事增泣歎一燈正懷人風期  
耿星漢

與星巢一別六年來書索詩却寄

渺渺燕山雲明明珠江月小別已六年相思髩如雪萬事感廢興尺書訴悲悅夜雨一燈寒壯心  
未消歇

失題

看花同是少年人塵劫消磨白髮新儘有江湖容傲骨何妨觴詠寄閒身憂深桑梓談微中友比  
松筠誼最眞喜見德星和月朗樂天三徑在比隣  
却換紅羊事事非江干只合掩荆扉元龍豪氣今高臥雛鳳新聲早奮飛晚節幸留寒徑菊交情  
偕賦故山薇水仙操歇絲桐冷却遇成連手再揮



乙卯元旦試筆

又見銀盤薦五辛  
整衣猶賸舊京塵  
一尊柏酒隨緣度  
千戶桃符著意新  
喬木百年懷故國  
梅花數點屬閒人  
轉移大費東風力  
消盡輕寒作曉春

黃孝子歌

孝子名和圃厦門人

代何碧流作

江夏有孝子至性何真淳  
在母已失怙賦運良艱屯  
惟母撫遺孤冊載茹苦辛  
哀哀鞠育恩高厚難具陳  
潔羞奉母膳寒煖體母身  
願作返哺鳥母壽逾莊椿  
昊天胡不弔我生胡不辰  
疾風隕草寒泉空悲呻  
泣拜父遺容痛念母慈仁  
欲報德罔極哀慕逾常倫  
輟社感王修負土識去聲郤  
詵孝爲百行首善爲萬葉  
循世道日淪喪珠洒風漸泯  
偉哉此至行足使薄者醇  
休聲播九宇風俗美八閩  
明德合旌廬嘖嘖江海濱  
昔我官斯土採風挹英塵  
緬懷君子堂抗言千載人  
綽楔高巍峨封樹森輪囷  
作詩紀孝行萬古鐫貞珉

爲駱孝廉鴻翔題其

太夫人貞栢長齡圖

柏舟自秉冰霜節  
卅載貞心耐歲寒  
閱盡蓬萊幾清淺  
麻姑石上樹千盤  
赤水珠生不汚塵  
平泉龍種幾經春  
定知天賦堅貞質  
自是仙人不老身  
枝葉蔕龍瑞色敷  
科名草長傍庭隅  
最難李約丹青筆  
寫作萱花散綺圖

題陳循仲姑丈滄海乘蓮圖卷

波濤壁立天如墨魚龍戲舞腥風黑四方上下同一雲欲濟何須辨南北縱心豈欲成孤往太乙紅蓮寄遐想要識衆生普渡心花開也應長十丈壯哉東海北海濱祇今猶自有其人去者滔滔來汨汨欲待澄清定何日

擬稿

附錄未用

人生如寄耳滄海眞且暮濁世共浮沉滔滔皆自誤願隨太乙星東去乘煙霧脫去火坑蓮便得慈航渡遠香韻益清此理了可悟周子洵吾師張騫非所慕聊作汗漫游忘機狎鷗鷺縹緲認蓬山記取來時路

陶園

一籬黃葉溷藤纏臘有茶香幾縷煙風捲霜花秋欲老日涵雲樹晚增妍偶然不速來三客回溯前途又一年屈指華林續高會故鄉回首總淒然

黃宣庭弟六十壽賦此敬祝

簪筆明時侍紫宸銜恩持節出咸秦一宮歸去陶元亮十載江湖賀季眞老屋牀聯棠棣雨重闌花燦錦堂春朝天兩度歸名集君是先皇舊使臣

彭澤田園亂後荒河山風景總蒼茫一編誰紀遺民社九日同開佚老堂

君入九日九老會

憤俗徵言嗤

犬疏用張巡語扶輿正氣在文章

君述懷詩有抱膝常吟正氣歌及不爲禽獸願爲人之句

平生忝託雷陳契願葆松筠耐晚霜



九月十九日汪莘伯懌吾兩孝廉約同吳玉臣張漢三盧梓川諸公寶漢茶寮

小飲爲展重陽會

拄杖風前問酒家，殘碑斷碣競相誇。雲山極目千峰翠，歲序驚心兩鬢華。九日尊疊同白社，

重陽日與

玉臣編修何屏山孝廉九人爲九老會

十年滄海負黃花，今朝共展茱萸會。何必龍山憶孟嘉。

三月三日文園禊飲

小園臺榭曲臨池，藹藹春光欲暮時。風暖鳥聲聽曉晚，午晴花氣蕩漣漪。稽亭禊事人千載，韓圃

嬉游酒一卮。

東坡上巳日携酒出游詩叩門却入韓家園

聞道行人薰袂語，明年應是太平期。

題石星巢兄與其女夫陳芑村姻世兄唱和卷

星巢大兄與余爲總角交，每相見輒以道義文字相勗勵。不願爲流俗人也。光緒辛丑，兄

宦遊桂林，遂爾契濶。宣統己酉，余由海外歸國，寓居京館。兄以改官入都，引見晨夕過。

從文讌歡，洽未及三月。兄復一官入蜀矣。辛亥亂後，余流寓香江者九年。乙卯忽奉兄

書，自是歲必一再至。已未余尙寄和感懷詩一章，未幾竟得兄訃，爲黯然者久之。此卷乃

在都時與其女夫芑村姻兄唱酬之作，展讀一遍，追念疇昔愴悵無已。敬賦長律一章以誌

哀感。

少日才名愧不如歲時文酒結相於遊蹤聚散天南北舊事淒迷夢卷舒萬里關河雙涕淚

梁文忠沒

後一月兄復奄逝

五年風雪幾函書重披冰玉聯吟卷疎雨殘燈一慟餘

### 上已修禊口占

樂遊尙憶西京記禊序長懷內史才此會年年苦兵革今朝端爲祓除來

### 題馬生芙蓉圖

維揚園上萬紅酣瑟瑟西風駐客驂

宋伯仁維揚園詩芙蓉喜見江南客故向西風一夜開

展卷依稀花一笑滿簾秋雨夢江南

### 失題

榕城秋老共離觴夢繞春明話玉堂宦轍雲連歌五袴征帆風順指三湘菊松舊侶盟寒歲臺榭新圖澹夕陽曾爲年家拜牀下承平回首總悲涼

正月十三日

萬壽節

臣

梁慶桂

偕臣

陳煜庠

臣

王仁煦

臣

汪兆鏞

臣

盧鴻翔

臣王宗緯

臣王誥

臣崔師貫

同於濠鏡

塿盧氏園

敬謹行禮

恭紀

薊門煙樹接長安華祝遙聯海外歡杜甫詩篇新記載漢家粉社舊衣冠地經百劫天猶醉雲擁千門日不寒珥筆待編行在紀遺民幾輩未彫殘



丙寅四月一日假十師齋約張漢三提法清讌以詩代柬

閉門風雨長春燕聞道清吟興不孤輿輦由來機瘳蹙杖藜端可藉携扶雉羹自是延齡法義易  
曾占勿藥無最愛益公詩句好光驅正賴一卮酬 屢勸公以飲食調 養勿服峻烈之藥

答某公見訪

窮簷寂寂長藤蘿敢辱高軒枉道過臥榻久憐舊朝士鼓關同作老頭陀游心竹素求安境息影  
風枝覓靜柯朋舊漫勞記車笠劍南詩句試吟哦

關揆生同年

大河南北結精廬訪舊時乘下澤車珠海春嬉年少酒金台雲遠故交書揚塵桑海人皆老善飯  
江湖我不如君每歲必往 還京津滬粵太息朋簪久離索相期林壑狎樵漁

春明遂隊憶花時萬里舟車共一癡歷歷浮雲觀世代潺潺流水照鬚眉三珠樹秀桐川澤吉甫詠仁 皆有名譽伯珍  
百歲居間沈炯詩最羨鴻光同白首獻將鞠酒佐深卮

感舊

繡衣回憶夜朝天愛國丹心日月懸海上遺臣有餘恫編詩猶紀義熙年  
赤雅成編推鄭露烏蠻列校重唐蒙南陲自昔稱荒服競有文章一代雄

寒雲苦雨不勝情地老天荒恨未平猶有暮年詩賦在悲涼家國庾蘭成

### 留寓鏡濠贈張漢三提刑

却愁鄉國經年別且喜羈棲是處同莫遣窮愁上霜髻暮雲相望夕陽紅

### 壽方拱垣兄八十

林巒寂寂幾何年

公辭惠濟倉席匿跡不與世事

華嶽峯聽喚子先

公三世皆壽

禮山堂迴一經傳

從學江先生

有年分齋治事胡安定

任教職有聲

結社聯吟白樂天

與麥雨巖諸公爲九老會

爲祝秋花常照客泮宮詩卷待重編

### 山行

村深林木半藏谿寂寂荒鄰唱午雞鳥弄竹叢寒影亂柳穿花塢碧陰齊桔槔聲裏荒畦注松柏  
陰中曲徑迷路轉峰巒斜障日四圍蒼翠接天低

### 久客澳門寄懷女夫鄧叔裕

仲華一笑薄纓簪玉潤聲稱世所欽圖籍萬篇藏笥富壺觴幾夕話鐙深傳經久著門生錄披胆  
猶談舊日心甥館卅年彈指過照人明月到如今

叔度年來分隱淪多君意氣出風塵酒當醉後寧論量詩到工時率轉真落落襟懷惟我輩紛紛  
酒肉笑時人能知今事崔俊似滿地江湖老此身



少歲狂名重，魏收蕭蕭華髮已盈頭。自耽仲蔚蓬蒿徑，不作盧敖汗漫遊。立雪游楊餘幾輩，希蹤朱陸助交修。文章久謝時賢好，此亦人間第一流。

北去南來輒阻，睽百年心事，絮沾泥罷。官翟尉門羅雀，灰志劉琨，夜聽鷄著。作等身君亦老，江山無恙，手重携浪游吾轉。飄蓬悔獨立蒼茫，落日低。

### 旅澳逾年百感交集拉雜賦此

衡泌栖遲一散人，嘯吟時繞薊門春。棄官彭澤惟思普，載酒元亭肯美新。海外文章猶正朔，山中草木有君臣。春秋大義分明在，祭統誰能辨十倫。

浪淘沙盡孰英雄，監子成名亦狡童。功德問誰三不朽，榮枯頓悟百般空。廿年歸客談瀛倦，千古才人厄運同。正恨天涯知己少，況教長在亂離中。

羈旅年年不自由，古稀垂邁復何求。游蹤已歷七行省，問俗曾經兩大洲。卅載功名蕉覆鹿，半生飄泊浪浮鷗。水雲尚有牀頭易，今古乾坤入望收。

看到斜陽成碧後，心情都懶願多違。捲簾山色疑排闥，倚檻花香欲上衣。燃得松根供夜照，采將薇蕨佐朝飢。人民城郭都非昔，華鶴千年莫再歸。龍蛇混濁是何年，猿鳥幽棲話宿緣。心靜轉教茶有癖，愁多自覺酒無權。且從舊輩談襟袒，擬向殘僧學老禪。俯仰九流捫蝨語，羞論問舍與求田。

出無事也食無魚余服差欣早遂初詩卷藥爐供暮景蒼松翠竹傍新居江湖滿地頻年夢風雨  
寒燈一卷書三徑過從稀俗客任他厚祿故人疏

殘夢怔忡那願醒淚枯無復泣新亭厦支一木談何易轂轉雙丸去不停北地風雲何世界南陲  
氛妖積陰冥垂楊最是無情物閱盡興亡眼尙青

漸覺年來老可憎滿頭霜雪髮 鬢餘生憂患憑詩筆逸興林泉共友朋鷄黍欣成前日約魚牋  
欲付素緘膝向平夙有遊山願懶散心情病未能

### 七十旅寓感懷

平生萬事總輸人荏苒光陰七十春樵鹿功名燕市夢磨驢襟袂洛京塵卞和璞玉曾三獻原憲  
華冠祇一貧自顧虞翻屯骨相青袍端是誤儒身

羈旅年年認故吾頭銜合署老潛夫景元雅會留汾社張壽字景元七十耆英會有當時鄉社爲高會句務觀詩心問鏡湖

陸放翁七十詩客來莫問先生處不釣娥江卽鏡湖時避地澳門故借用之花鳥四時開府宅雲林尺幅米家圖萬松山上天然畫何日煙波

### 作釣徒

秣陵天遠好揚舲爲詠循幾度經述德惟慙機有賦學詩回憶鯉趨庭主恩尙靳三持節  
左文襄保

薦先君凡三次僅宦蹟重來一聚萍身在江湖心 魏闕那堪夜雨十年燈叙江寧事  
謫理兩江總督



小醜潢池敢弄兵 乘輿巡狩賦西征 麻鞞間道趨 行在綸綍明時出上京 晚度洛橋寒積雪

詩題驛壁有十二首

春融秦嶺霧初晴 携將太華峰頭月

與李院長柳谿伍太史叔傑暨令子孝達遍遊三峯刻石題名

伴我南歸萬里程

庚子奔赴行在

靜掩衡門綠草肥 風潮何事忽翻飛 爲陳民瘼偏疑抗 始信人間善嫁非 朝政清明終得直

天恩高厚洞知微 電車坪石通行軌 隱隱初心願總違

鐵路風潮

身隨日月轉西東 閱盡狂濤駭浪中 萬里乘槎同博望 數洲列校愧文翁 殊方久客譜蠻語

在美洲與

辦國學校共八所

瀛海歸帆戀舊叢 知已天涯未寥落 瑤華時復付郵筒 赴美興學

春明裘馬自委蛇 點點繁霜上鬢絲 講學會陪文士席

辛亥學部奏立全國學會多聘海內知名之士旋以小學廢經案交會審查福建陳孝廉某登台演說痛

斥倡議者闕堂秩序遂大亂

才猷深愧相臣知 談經未奪淮陰幟

桂從宋侍御雲子陶郎中拙存諸公後亦各具說帖力爭而此後遂閉會諸公紛紛出都門

去國惟吟

正則詞自把鄆泉 一杯酒思量都是負 恩時 回國入學部

逐隊詞壇太瘦生 閒翻史傳識民情 談空稷下言多謬 才數深源論未平 傲態只供吾一笑 浮名

敢與世相爭 廬陵人物分明在 毀譽何曾足重輕

居京

河山風景已全非 半落閒庭舊板扉 抗志欲銜東海石 食貧惟采首陽薇 時聞鐵馬鳴朝鐸 猶向金門望夕暉 畢竟橫流增百感 王尼老去更何歸

種松歲月幾翻新數徧龍鱗倍愴神祇向滄桑添閱歷獨支門戶自艱辛干戈環海嶠雙鬢書劍窮途老一身笑弄孫曾作佳話餘年我是太平民

先母 唐太淑人忌日敬賦

燈影書聲下絳帷當年慈母卽嚴師先君子遠宦滇南桂在家讀書先生母唐太夫人督課甚嚴何期楊戴登科日正是王脩輟社

時風樹淒零餘涕淚庭荆猗靡共携持阮籍詩二子有何好猗靡共携持岷思亭築名空在辜負詩人白雪詞予欲築亭名以

岷思石觀察星集因有人謀築岷思亭之句

張豫泉提學以明代千遺民詩詠見示敬題二律

黨錮東林明祚終崢嶸士氣百年中桃花入漢餘流水禾黍傷周泣故宮一代興亡看覆鹿千秋忠義貫長虹歌聲擊罷西台竹淚染鵲枝葉葉紅懷古傷今感百端閒從野乘檢叢殘文章却後風霜老薇蕨山空日月寒銜石有心憐白髮浮家無地賸黃冠闌幽自具如椽筆留作人間信史看

前題 五律未用

節義千秋在聲名異代聞流風晉處士高世漢徵君家國艱危日河山黯淡雲篁墩成績錄慟哭動蒼髮



玉臣編修談次謁泮有期

詞林清譽滿長安養陔南賦潔蘭嶺海儒宗見師表廬陵人物冠詞壇畫圖西洛傳張渾事文類聚香山九老

會張渾年七十七 箸述東京重景需來歲預宮重謁日天章遙下五雲端

霓裳隊裏記羣仙明史悲吟有剩篇公有詠明史百首 跌蕩琴尊離亂日優游詞賦古希年新詩往往出金

石幽意飄飄凌倥傯一作運筋瘦硬書通聖卷栗盤深骨亦仙 回憶當時文社會惠連舊夢已淒然與先兄少浦為文社之會今六十年矣回首淒然

吳玉臣編修重謁泮宮蒙 恩賞扁額率成二詩為賀

鄉園歸養謝朝榮又撥芹芽筆雉羹閉戶定知多歲月得官何必盡公卿謝山講受羅羣彥惜抱

文章有盛名天語褒嘉為士表歸然嶺嶠一儒生

吾家勝事話從前同治己巳先伯祖星藩公重謁泮宮會孫廣淞外孫吳寶洛同時入泮樂類重逢己巳年東塾詩章哦舊句 陳蘭浦先生賀星藩公詩有博先生

得成一笑當年付未有人之句 讀齋金石有新編翁覃溪學士重謁泮宮著有金石錄公亦輯粵東文雅 采芝人羨商山皓尚齒風高潞國筵文潞國公七十

七歲為書英會賦詩云當筵尚齒尤多幸十二人中第二人 豫祝瓊林拜 恩宴搗詞寫遍五雲箋

辛未重游泮水紀恩詩四章

髫齡習禮類池濱花甲回頭歲又新仕宦坎軻成老物衣冠古拙笑陳人願隨葵抱心傾日採得

芹芽中欲春寂寂 宮牆重展拜杜倫原是秀才身

天上祥雲擁瑞噉 宸章璀璨貫衡門材翹束箭言殊重風溯南園蹟尙存廿載一身甘市隱七

年兩度拜 君恩瑯琊東渡思當日王謝烏衣未易論

歲歲宮花喜共盛時試士 國恩覃美談誰續皇明錄 王弇州先生有皇明盛事錄 雜誌應編老學庵依草幸

逢何子皙 南梁書邱遲文章如落花依草同時見賞於何點點字子皙子辛未應童子試大宗師適爲工部侍郎何公棣山 吟蘭敢步褚河南銜枚藝苑今重記驚馬

猶思一戰酣

吾家己已舊風馳 一作留佳話 留取一作徵到 琉球海外詞 己巳歲先伯祖星藩公重遊泮水有琉球留學國子監者和詩 蘇籀能談坡老事杜陵

嘗示濟孫詩橫流豈意成滄海貰酒惟堪醉鞠籬淵穎前規猶未遠白頭吟望有餘思

### 讀史雜咏

五帝官天下夏禹始傳子商周更征誅後世滋多事

勸進資禪讓臣下恣朋黨唐宋莫不然世獨罵操莽

后稷播百穀飲食昉何年瓜祭必齋如祇合學聖賢

井田制已廢商君盡地力安石行青苗赤子溝中瘠

承平無百年治久必思亂應時合揭竿陳涉先立傳



顏回負郭趙一鶴分餐必蝓而後可苦人以所難  
逃名名轉盛才子溯黃初我獨懷諸葛乾坤一草廬  
王粲厭風塵登樓絕無賴一曲念家山他鄉成老大  
猿鳥戀舊林相約入山深蟬歌寒蛩咽淒淒自古今  
相逢青眼少容易白頭年亦自雕蟲悔文章幾輩傳

### 跋

辛未初夏方仲偕弟嘉彬奔赴 先祖考資政公喪朝夕哭奠既三處請之四叔發書篋得  
先祖所爲詩文若干首及少作若干首既殯稟請 家君亟付手民以永其傳顧自念早  
歲游學北平垂十載去夏始一歸省 先祖體健神王老如盛年兩世家慶重游泮水方深  
欣慰詎昊天不弔降此鞠凶至於此極而今已矣 先祖音容猶居心目若欲再承教誨不  
可復得矣 先祖爲詩得力於漁洋駢文得力於卷施閣古文得力於龍門惟素懷謙抑辛  
亥後感傷於挹尤不願以詩文行世成輒棄稿不復珍惜因此搜集遺佚僅得此數若夫其  
清風苦節海內所知無俟覲縷且有行述家傳在方仲少失學不能文謹綴數語於後掩卷  
悲咽際明不成寐季夏晦日孫梁方仲敬跋

式沙字記文

YORK UNIVERSITY

JUL 03 2001

EAST ASIAN STUDIES

37











#4081